

宋學士全集

六



貴州省圖書館
中文書香



宋學士全集

(六)

J
17.8
1.2115

宋 濂 撰

宋學士全集卷之九

序

送部使者張君之官山西憲府序

天地正氣。細縕輪困。不折不回。行乎太虛。在物受之。則爲解廡。爲屈軼。在人受之。則爲剛烈之士。剛烈之士。貴勢莫能加。威力不能變。參乎氣化。關乎治體。其重於物。又不翅百千焉。嗚呼。正邪不兩立。正氣伸則邪沴廓清矣。我國家始建國江左。輒從秦元之請。立按察司。設官分職。彈劾百僚。所以伸正氣也。迄今垂二十年。憲度益嚴。遴官益精。有若山西憲僉張君孟兼。尤號稱職者也。孟堅性鯁亮。不善爲依阿。人有曲必面白之。雖慚沮羞縮。不暇顧。然亦無他腸。當良朋盍簪。酒酣耳熱。抵掌笑談。胸中森然。芒角必盡吐出。乃已。其氣袞袞不衰。名上中朝。選教胄子。久之。遷南宮奉常。奉常南宮。掌禮儀郊祀之事。無以據其耿耿。及今出持使節。知孟兼者。謹曰。孟兼行哉。民生休戚。無不得言。吾見輅車夕至。而封章朝上也。貪昧舞法。吏。吾見望風畏讐。解印綬而避去也。民冤之不伸。戾氣鬱結。吾見渙然而冰釋也。孟兼行哉。雖然。鷺鳥之揚揚。不如威鳳之嚙嚙。狻猊之疆疆。不如祥麟之容容。刑法之堂堂。不如德化之雍雍。人不務德。則已。苟有德焉。又何儉壬之不革行哉。儉壬革行。正氣之復。正道之行也。孟兼盡於此。而留意哉。吾鄉先達。自宋以來。繡衣持斧。赫赫見稱於時者。凡六七人。嗣芳猷而繼遐軌。竊於孟兼望之。孟兼行矣。孟兼精於古文。

辭前御史中丞劉公極稱道之。尤深名理之學。其與李證應奉往復論性書。上徹九重之聽。蒙召對左掖門。士林以爲光榮云。

送黃仲恭赴官餘姚序

烏傷黃仲恭翰林侍講學士黃先生之子也。以廕補官同知餘姚州事。將行。縣大夫及鄉之壽俊先生之門人咸往餞於繡湖之上。離觴旣傾。縣大夫進而言曰。同知之職。在昔爲郡丞。爲別駕。爲司馬。雖均號上佐。其實非事之長。而州牧或得以辟置之。今則出於朝廷之命。事之大小無所不當問。其職之不輕也較然矣。奈何官失其分。強者忿驚自將。與守抗衡。弱者依阿取容。又一切局於鉗制。不敢吐一氣。出一辭。二者胥失也。方今四海塵冥。財用乏絕。民心危迫。爲天子佐二千石者。當如是耶。願仲恭以此爲戒。鄉之壽俊又進而言曰。先王之制酒禮。一獻之間。主賓百拜。所以避其禍也。後世爲麩藥之託。終日昏冥。鮮有不債厥事。昔之人嘗有碎力士之鎗。破鸚鵡之杓者。所以藥沈痼。拔深溺。進新德也。願仲恭以此自勗。先生之門人又進而言曰。士君子非以傳圭襲組爲難。能世其德業爲難。仲恭先居士以布衣欲借劍斬佞人頭。其剛大之氣。至今可掬。先吏部又以學識受知丞相。宦業益顯。今尊公先生又以文章爲海內第一學者。仰之如北斗。如泰山。繼其後者。不亦難哉。願仲恭以此自勉。仲恭皆再拜曰。梓雖不敏。敢不夙夜祇奉。嗟夫。今之贈人以言者。多貢以諛辭以相悅。孰有如羣公者乎。稽其所言。縣之大夫。所以勗其職也。鄉之壽俊。所以樹其德也。先生之門人。所以昭其世也。能是三者。其何愧先生之子耶。仲恭尙愼哉。仲恭才贍

而智周能力於行。弗滯於物。其必有以處之矣。濂受學於先生最久。而與仲恭遊尤密。敢直紀其事。復賦河有行舟四章以別。詩曰。河有行舟。其水瀾瀾。之子於征。其去如矢。河有行舟。其水浪浪。之子於征。言戾海邦。河有行舟。其水沃沃。之子於征。曰佐州牧。之子行邁。我懷孔悲。有椒有蘭。苾如芬如。持以贈子。綴之裳衣。吁。其別矣。如何勿思。

送呂仲善使北平采史序

皇帝卽位之明年。四方次第平。乃詔文學之士萃於南京。命官開局纂修元史。爰自太祖開國至於寧宗。凡一百二十六年。已據舊史彙括成書。而元統迄於終祚。又三十六年。遺文散落。皆無所於考。丞相具以上聞。帝若曰。史不可以不就也。宜遣使天下訪求之。於是儀曹會諸史臣。發凡舉例。具於文牘。遴選黃忠等十有二人。分行各省。僉以爲北平乃元主故都。其文獻必有足徵者。非精練博敏之士。未易以集其事。予友仲善。方司膳成均。實應其選。戒行李且有日。與仲善游者咸爲賦詩。以予嘗與刊修之末。俾題其篇。端嗚呼。傳有之。國可滅。史不可滅。然旣亡其國矣。而獨謂史爲不可廢者。其故何哉。蓋前王治忽之微。與衰之由。得失之效。皆可爲後王之法戒。史其可滅乎。然自漢以迄於近世。類多羣臣奏請。始克緝成典籍。惟我皇帝旣承大統。卽出自淵衷。孜孜以纂修元史爲意。則其神謀睿斷。卓冠百王。偉量深仁。與天同大。巍巍乎不可尙已。仲善行哉。探石室之遺餘。詢名賢之紀錄。俾信史免於闕文。傳諸後世。其不有望於仲善矣乎。仲善行哉。弔齊魯之故墟。撫幽燕之陳迹。呼酒長歌。拔劍起舞。將又不在于仲善矣乎。然則仲善

茲行亦壯矣。若予者年踰六十。髮白神耗。不能逐車塵馬足之間。以據寫其中情。仰睇飛雲。唯有慨然遐思而已。然而鋪張上德。以昭布四方。垂諸無窮者。史臣之事也。庸敢備書之以爲序。而區區離別之懷。有不暇計也。仲善。姓呂氏。章貢人。有學有文。其聞譽蓋翕然云。

送徐教授纂修日歷還任序

洪武六年秋九月。皇帝御謹身殿。從翰林學士宋濂之請。妙柬文學之士四三人。纂修大明日歷。而詔濂與吏部尙書詹同司總裁事。當是時。杭州府學教授徐君大章。實在選中。開局於內府。日給太官之饈。而令中貴人護閣。非奉敕旨不敢入。其事至嚴也。濂時與大章辰入而申出。凡興王出治之典。命將行師之績。采章文物之懿。律歷刑法之詳。咸以事繫日。以日繫月。以月繫年。必商權而謹書之。濂年加耄。不能有所猷爲。唯發凡舉例而已。其助我者。大章之力居多。越四月書成。共一百卷。遞日上奏。登盤龍金匱中。奠於丹陛之下。縉紳之家爭欲薦大章入詞林。大章堅以足疾辭。濂因爲陳情於上。乃詔賜文綺織緡各三裝。錢六千文。仍俾其職爲眞。故事。教授試職三年。俟育材奏功。方許眞授。大章時未葦年。乃異數云。大章將還。洩教席。濂餞之秦淮河上。與之言曰。教授之職。雖設於宋。其任亦云重矣。在紹聖初。詔令中制科。及進士第。上五人。禮部奏名上三人。府監廣文館第一人。始令爲之。大章起布衣而輒膺其任。豈無其故耶。漢法。太史公位丞相上。天下計書。先上太史公。副上丞相。由唐及宋。宰相皆兼史官。其重如此。大章以一教授之微。乃召入史館。與編摩之列。又豈無其故耶。蓋大章博覽載籍。發之於詞章。霞粲波縈。峻潔鮮朗。

威儀儼雅。又足爲後進師表。聲名籍籍起儒林間。當此聖明之朝。材咸求實。不於其官於其人。故大章致此無難也。然而黃琮之貴。必登於方明。大雅之音。必奏於清廟。理勢則然。大章以溫然之姿。鏘然之文。乃鯁鯁下教於一郡。如惜才之論何。濂誠耄矣。髮種種被肩矣。聰明不及於前時矣。詞林清切之班。非大章誰所宜堪。行將力薦而用之。脫使大章實不良於步趨。雖臥治之亦可也。大章以爲何如。明年春正月。友生金華宋濂序。

送王子充字序

同門友王君子充謂濂曰。樟名凡三易。初名偉。次名漳。後復更今名。文雖易。皆從章者。以其聲之近也。其名偉暨漳。時鄉先達內翰柳公文學吳公嘗爲之說。唯今名未有暢其義者。幸同游學黃文獻公之門。敢以累吾子。嘗有以詳告樟也。濂曰。子充其欲存古之道哉。夫樟之爲物。古之蔽膝。所以被於裳衣之上。覆前者也。其制則上廣一尺。下倍之。長又倍之。頸視上廣劣其半。肩之革帶視頸又去五之三。其名則江淮謂之樟。或謂之鞞。關西東謂蔽膝。魏宋南楚謂之大巾。齊魯之郊謂之襍襦。西南蜀漢謂之曲領。或謂之襦。又謂之襜焉。陳楚謂之松。其義則古者田魚而食。因衣其皮。唯知蔽先後而已。後王易之以布帛。而猶存其蔽前者。不忘其初也。今吾子充閒居烏傷溪上。日求四庫之書。囁嚅其芳潤而馳驟厥辭。藻火炎而交龍飛。林豔媚而川花鮮。翠霞縈而頰虹迴。可謂能一時之至文矣。今乃以樟爲名。而子充是字。殆欲存古之道。以反無文之文乎。無文之文。其文之初乎。於戲。子充之不忘乎初者。豈直文而已哉。由是而充

之酒醴嘉矣。必思玄酒明水之爲尙焉。莞簟安矣。必思蒲越藁鞞之爲貴焉。黼黻文繡美矣。必思疏布之可登焉。丹漆雕展華矣。必思素車之可乘焉。昔者先王以此交神明而防民行者。欲人反始尊質也。子充率是道也。秦古熙醇之行可馴致矣。夫以燔黍捭豚。不可施於禮文繁縟之日。卷領結繩。不可用於太樸分散之時。此無他。勢有不同也。況爲士者當與世推移。因其所宜變而通之。以潤國家爲務。而欲泥古之質。詆今文。譬猶圓柄而方鑿。必有不合者矣。雖然。此非所以言子充也。子充厲古學而倅古行者。其心亦豈恤戾於今哉。蓋古之士也。確。今之士也。爽。古之士也。白。今之士也。墨。古之士也。靖。今之士也。莽。古之士也。貴。今之士也。賤。子充欲存古之道者。其將反始而尊質乎。成已成物之道。皆能由是而充之。庶幾無愧於名若字矣乎。濂也不敏。亦嗜古學者也。姑因子充之請。爲詳舉諸經之疏。及爾雅方言說文釋名等篇。而暢其義如此。若所云婦人之褱。謂縞綵也。卽香櫻也。王后之服褱衣。謂畫袍也。褱當爲暈。卽暈雉也。五彩純備者也。皆非子充命名之義也。

贈行軍鎮撫邁里古思平寇詩序

至正丁酉春三月。括寇復興。蟻集蜂攢。衆號數萬。遂陷婺之永康。蔓延東陽。二郡震驚。惴惴度日。莫保朝夕。行御史府聞其事。欲命將討之。詢謀於衆。僉以爲邁里古思公名進士也。今長治越城中生聚。而其人文足以附衆。武足以威敵。若討之。莫如公宜。於是命公總護諸軍以行。公受命已。卽禡纛於門。載旆就塗。如拯溺焚。三月甲申。抵東陽。公延見耆耆。訊以山川險阨。與盜出入恆狀。笑曰。賊在吾目中矣。當爲君一

鼓卻之。乃申號令。整部伍。扼其要害。分屯方巖山。夏四月庚戌。命諸將黃中等。以奇計給賊。賊方椎牛豕高會。聞兵至。皆吐舌相顧。諸將橫槩大呼而前。自己及未。大小戰十二餘合。士卒奮勇。無不一當百。擒僞將軍三人。斬首六百級。奪旗鼓槍矛無算。乙卯。賊復空碧出戰。諸將踴躍用命。兩兵方接。公親統精銳兵截其衝。賊大潰。追逐二十餘里。斬首八百級。擒僞將軍六十有六人。辛酉。兵進屯胡陳。諜知賊所在。縱兵深入。賊已宵遁。焚其廬舍殆盡。賊自是不復能兵矣。壬申。師還。邦人士相與曰。進士之效久不白。武夫俗吏。恆指斥以爲戲。識者短氣。公本一書生。杖劍卽戎。而其功烈輒焯焯如此。彼噲噲者。縱人百其喙。尙敢謂儒無人耶。若公之爲。亦可謂有文武全材者矣。嗟乎。自括寇之興。凡其所涉之地。百里無居人。豈惟無居人。方菲莖出師。雖方嶽大臣不能禁侵掠。其慘毒蓋有與寇不相遠者。公帥師而來。不爲不久。耄倪恬嬉。若不知其兵在其境者。又非公之賜耶。然則公之有勳於吾邦者。甚大。欲貺之以犧牲。則犧牲公之所自有也。欲投之以玉帛。則玉帛非公之所好也。其將何以爲公之報哉。夫鋪張盛美。播之方今。而傳於後世者。莫如詩歌。吾黨之士。盍留意乎。衆皆曰。然。於是陳樵先生倡之。邦人士咸作之。而命金華宋濂序之。

贈龍泉簿蔡君序

玄默攝提格。其月白。余氣清。候冲。鮮麗襲衣。虛幌生白。而走也。獨居。有美蔡君。龍淵之涓。容儀侃侃。言辭熙熙。不觀其行。心已必其有爲。詢之儒紳。僉曰。建哉。是夫也。良使民馴。以綏。創傷未平。摩而嬰之。流逋未復。宇而寧之。征賦方繁。均而則之。妖魃害稼。祠而斥之。吏有所程。岷有所依。自此而升。其誰曰不宜。世有

恆言。虎豹師師。據山之厓。而百獸辟易者。則以其威。鷹鷂權權。游林之隈。而衆鳥襲服者。其力之施。當世變俗移。愈鬪而濟。方將峻法以繩其奸。而寬綏是務。何言之迂。嗚呼。噫嘻。民其殆。而物之生也。每闕秀於多霜之慘。而甲坼於春三之暉。雉安桴粥。麥秀兩歧。較之殘民以逞。而傷天和者。又孰是而孰非。不有伊人。其阡於危。徵吾蔡君之事。而感慨於斯。白牛老生。援毫引辭。以白其勤。以揚其輝。以播於時。知之者謂足。爲在位者之戒。不知者以爲可怒可愕。而詆余文之尙奇。

贈侍儀舍人林成之序

余家食時。有同門友宜君彥昭。爲溫之平陽判官。當報政而歸。州之文學掾林成之。實護送來浦陽。成之以余頗知學也。自浦陽謁予金華山中。相與講學術異同。論風俗淳漓。至更闌月落。蟬聯不得休。臨別造四言一章以贈成之。既去。西東絕不相聞。予亦應中書之聘。出仕熙朝。有從平陽來者。輒詢之。咸言成之處烟霞泉石閒。詠詩讀書以爲樂。予亦爲之驩然。頗自念相望二千里。不知何時與成之盍簪乎。今年夏。予在南宮。忽有踵門而拜者。予弗能識之。叩其姓氏。則成之也。嗚呼。相別未十年。壯者日益衰朽。至熟視良久。亦不記其顏貌之真。人事之不堪把玩如此。可勝歎哉。於是與之坐而慰勞之。成之頗往來於予門。問詩若文之法。予以舊游之故。歷舉體製之殊。音節之異者。壘壘列之。未幾。成之忽來告曰。小人有母。貧寔不能存。雖幸竊祿於朝。而烏鳥私情。懸懸不能忘。昨已請於廟堂。陳其中情。涕與淚俱下。執政大臣憐其志。予告一百日。俾迎養於南京。今將行矣。執事其能賜之一言乎。夫成之爲退思先生五葉孫。先生實

考亭夫子高弟。世稱十哲之一。其家世之懿不俟言也。成之以茂才貢上。銓曹擢爲侍儀舍人。出入禁省。日覲天顏。整肅乎鷄班。峙立乎螭坳。其寵榮非他職名所可比。今又奉板輿迎親而來。母子怡愉。聚於一堂。何人不慕豔之。亦何俟予言也。無已。則有一焉。予與成之別後。成之學問日新。予則摧落不振。四庫之書廢忘者十九。視舊相見時若兩人焉。此無他。習與怠相仍。氣隨世所移故也。成之宜益自奮勵。毋若予之所爲。則下不失家世之懿。上無負國家之恩。予與成之言者止此而已。若夫溫之先儒。卓然以學術名家。或沈潛性理。或有志事功。或推明經制。大抵與吾婺諸賢同。其於醇疵得失之間。多有可議。予雖欲言。雖更僕亦不能盡也。尙容他日爲成之發之。成之名伯生。篤實好學。有士行。絕不同於流俗云。

贈林經歷赴武昌都衛任序

莆有林君士衡。由進士起家。署爲比部主事。政成。遷武昌都衛經歷。中朝士大夫相率賦詩餞之。而以首簡授予序。序曰。昔者艾軒林文節公謙之。有慕伊洛之學。聞吳中陸子正得和靖尹氏之傳。因往從之。自是專心於聖賢踐履之事。一言一動。莫不以禮。遠近學者。翕然尊事之。南渡後。以伊洛之學倡東南者。實自艾軒始也。艾軒嘗言曰。道之全體。全乎太虛。六經既發明之。後世註解固已支離。若復增加。道益遠矣。嗚呼。其言不亦至哉。艾軒既沒。其道一傳於林文介公學可。再傳於陳文遠公元潔。前承後引。重徵疊照。新學小生。咸有所師法。非先王之言弗道。非先王之行弗行。人號之爲小鄒魯云。迄今垂三百年。流風遺俗。猶有存者。家談仁義。而悅詩書。亶然非他郡所可及。君子之澤。何其深且長哉。今吾士衡。固艾軒諸孫。

也。其家學漸濡。不俟言矣。文行之謹勅。亦從可知矣。其治獄刑曹用法寬恕。士君子復許之矣。今擢爲戎府元僚。則其協比師率。輯和兵民。修治戎器。用戒不虞。此特其所優爲者爾。雖然。未可輕也。武昌爲湖湘一大藩障。其行中書所轄凡二十七府。府各置衛。或千夫長戍之。而都衛總其凡。其職與省臣鈞禮。地連數千里。戍兵數十萬。其練閱之方。征調之節。唯元戎能制之。元僚能贊之。其任之重也較然矣。自道學不明。學者纏蔽。傳註支離之習。不復見諸實用。談兵之家。尤以白面書生。營之士。衡宜知所自重。庶幾乎其可也。雖然。予惡用是。咕咕爲哉。昔也艾軒提點刑獄廣東。親檄郡兵。破殄嶺南郡醜。阜陵聞之。悅曰。林某儒生。乃知兵耶。特加直寶謨閣。是知有用之學。可以治兵。可以撫民。可以興禮樂。可以移風易俗。無所往而不當。士衡尙推家學而行之。其有不獲者哉。況當聖皇御寓。四方無烽燧之警。皞皞熙熙。不異於唐虞之世。士衡日與大帥共論文武忠孝之道。使勳在盟府之臣。保其寵榮。以終其身。以遺其子孫。暇則雅歌投壺。發舒性情。寤寐羣經。一惟伊洛之是趨。俾人人咸稱之曰。是子也。無愧艾軒之後人者也。顧不盛歎士衡之行。吾言止此而已。

贈鄭院判序

有其術而無所於用。值可用之機而人不能任之。欲望其以有成者。百家之所難也。惟醫爲甚。扁鵲華佗。天下固不常有也。使有之。而值淺易之疾。遇難語之人。上之不足展吾術。次之不能從吾所欲。爲法宜鍼。而責我以砭。法宜實而命我以虛。乖逆拘執。卒之與恆醫無異。是豈醫之罪哉。勢使然也。誠有善任人者。

惟吾所用而不較。期以成效而不泥於私謀。人人皆可得而免矣。故疾有死於過愛。而生於達理。過愛者恐其危而不肯任人。達理者知非己之所能爲。則信人而求其成效。其達者乃所以生之。而愛乃所以殺之也。若福建承宣布政使陳君彥銘。其達理者與。陳君之妻。免身得寒疾。羸弱已甚。徵太醫院判官鄭君某藥之。鄭君請曰。愈否在吾。幸無撓我。陳君許諾。鄭君乃視脈所宜。集藥之良而療之。或謂藥性與疾戾。以語慴陳君。君不聽。任之不變。已而果愈。陳君出金帛謝之。鄭君辭曰。子善任我。故爾。使子不我任而自用。雖欲愈可得耶。且金帛非所欲。子嘗善太史宋公。得其文畧。我足矣。陳君以其言告余。謂陳君之善任人。鄭君之不伐其事。皆可稱。且類古之爲治者。蕭曹房杜。雖爲俊傑之士。使其時不善任之。黎庶何以享隆平之澤。而其名聲事業。何以垂至於今乎。然則二君之事。取喻則遠矣。序而傳之。豈特可爲任醫者之勸乎。

贈會稽韓伯時序

越韓君伯時。從府君辟爲山陰教官。名上尙書吏部。吏部同儀曹禁林。議命經史二題試之。考定入格。伯時將還山陰蒞教事。徵一言以爲別。余聞古之學者必有師。師以傳經爲尙。術業有專攻。授業有源委。如田何之於易。夏侯勝之於書。浮丘伯之於詩。劉歆之於禮。張蒼之於春秋。皆遞相祖述。不敢妄爲穿鑿之說。人心壹而教化美。莫此時爲然。自師廢。民散之餘。學者不必有師。師不必以傳經爲意。以致家自爲學。人自爲政。而大道或隱矣。近世婺越之間。有二大儒出焉。曰許文懿公。曰韓莊節公。皆深於濂洛關閩之

學。護守師說。傳諸弟子。而不爲異言所惑。其布之方。較諸視於金科玉條。不敢輕有改易。四方之人。類能辯之。觀其容止。聞其論議。則曰。彼韓公之門人也。此許公之高弟也。薄俗之習。因此爲之一變。余生於婺。與許公同鄉里。雖獲一拜床下。而未及與聞道德性命之言。而許公棄捐館舍。遂從其徒。而私淑之。韓公在越。不遠二百里。會其已亡。欲一見且不可得。而況於其餘者乎。余竊自念。爲韓公之學者。布滿遠近。尙幸見之。如私淑許公之徒者。久未能逢其人。今年夏。乃於京師。獲與伯時遊。伯時韓公諸孫。而又得卒業於其門。其人溫如。其文燁如。其言論鏗如。是誠無愧於家學者。庶幾有以畢余之志。適總裁史事。未及與伯時相叩擊。而伯時將去。反欲徵余序以識別。余將何言哉。雖然。山陰雖小邑。亦古者子男國也。伯時之行。以人師自處。邑之子弟。皆北面而受業。使乃祖韓公之道益明。斯蓋不辱於傳經之家矣。後之君子。稽其源委。寫以成圖。如田何夏侯勝諸人故事。夫豈不可哉。顧余不敏。操無用之學。徒以空文。出應時須。畫蚓塗鴉。日不暇給。思欲如許公家居講授而弗之遂。其於伯時之去。寧不散豔於中乎。異日投簪而歸。當謁伯時於越。相與泛賀湖之晚波。挹禹山之秋翠。以盡私淑於伯時者。亦豈爲晚哉。伯時以爲何如。是爲敘。

贈醫師周漢卿序

余聞松陽周君漢卿。以醫名者久矣。一日。余婿鄭叔韓復來青蘿山中。述其詳。曰。周君之醫精甚。他固不能知。姑卽士君子所常道者言之。括蒼蔣仲良。左目爲馬所蹄。其睛突出。懸如桃。羣工相顧曰。是系絡旣

損法當督。周君笑不答。以神膏封之。越三日。目如初。華川陳明遠患瞽者十齡。百藥屢嘗而不見效。自分爲殘人。周君視之曰。是瞽雖在內。尙可治。用鍼從背入。睛背掩其翳下之。目歛然。辯五色。陳以爲神。武成男子病胃痛。當痛不可忍。嚼齒刺刺作聲。或奮擲乞死。弗之得。他醫用大攻湯治。皆不愈。周君以藥納鼻竅中。俄大吐。吐出赤蟲尺餘。口眼咸具。痛卽止。東白馬氏婦有妊。歷四月不產。形瘠。疔且黑。周君脈之曰。非孕也。乃爲妖氣之所乘耳。以藥下之。一物如金魚。疾旋已。永康應童嬰腹疾。恆洵。儂行久不伸。周君解裳視之。氣衝起腹間者二。其大如臂。周君刺其一。魄然鳴。又刺其一。亦如之。稍按摩之。氣盡解平。趨無留行。長山徐嫗遭驚疾。初發。手足顛掉。褫去裳衣。羸而奔。或歌或哭。或牽曳如舞木偶。粗工見之。吐舌走。以爲鬼魅所惑。周君獨刺其十指端。出血已而安。虎林黃氏女生瘰癧。環頸及腋。凡十九竅。竅破白瀋出。右手拘攣不可動。體火熱。家人咸憂。趣匠製棺衾。周君爲剔竅。每長二寸。其餘以火次第烙。數日成痂。痂脫如恆人。於越楊翁項有疣。其鉅類瓜。因醉仆階下。疣潰。血源源流。凡疣破。血出不休。必殺人。他醫辭不進。周君用劑糝其穴。血卽止。烏傷陳氏子腹有肉隱起。捫之如罌。或以爲奔豚。或以爲癥瘕。周君曰。脈洪且芤。癰發於腸也。卽用燔針如筴者。刺入三寸餘。膿隨針射出。其流有聲。愈。楮槩黃生背善曲。杖而行。人以風治之。周君曰。非風也。血滯不通也。爲刺兩足崑崙穴。頓之。投杖而去。其醫之甚精如此。薦紳先生宜有以褒之。揚之。敢以序文爲請。余惟古之神醫。一撥見病之應。因五臟之輸。乃割皮解肌。決脈。結筋。搦髓。揲荒。爪幕。以爲治。所謂鍊精易形者也。今則人誰知之。其次則湯液體醢。鑊石橋引。案抗毒熨之法耳。是

法亦絕不傳。其僅存於世者。往往不能用。用或乖戾。以致天闕而傷生者多矣。夫醫者民命所繫。一投丸之間。一授箴之際。則安危由此而分。何可不致謹於斯邪。昔司馬遷立倉公列傳。其所治自齊侍御史而下。凡十有餘人。皆歷疏其病狀。辭雖繁而不殺者。其意蓋有見於此也。余敢竊取斯義。備以叔韓所述。序次成文。以遺周君。又安知他日脩史傳者。無采於余之言哉。余耄矣。且有脾禍。吐涎日二三升。蔓延將四稔。叔韓尙邀周君以起余之疾者乎。

贈別胡守中序

予在金華山中。聞涇人有胡恆先生。學該才雄。其形於篇翰閒。春華敷而秋漢明。卿雲爛而甘澤滋。陰陽倡而律呂和。予喟然曰。是何其文之鏘鏘哉。焉得擣瓊屑而爲之食。斟玉漿以爲之飲。俾其壽而康也。及余來江左。道出涇上。涇上父老又言。先生蓋有道者。舊館人遭兵禍。挈挈露走。人指將及千。先生避舍舍之。復割餼糧與共。明日或卽盡無憾。未幾。涇亦亂。先生室廬毀。備歷艱險。昔有寄黃金者。先生腰之。與同臥起。一年事定。寄者已寘勿問。先生上謁。解還腰中金。或讓其愚。先生曰。吾重吾信。金爲輕。予又矍然曰。是何其行之彰哉。老父言已。指先生之居在翠微庵。霧中矯首西眺。不能挾天風。一至其處。悵然久之。庚子冬。予獨處金陵官舍。方著書自娛。忽有客來叩門。童子執帖入。覽其氏名。則先生也。予驚喜出迎。不覺展齒之折。旣見。目其貌粹而莊。耳其言粲以文。余又喟曰。是豈非懿然君子人哉。自是日與之游。談析名理。劇切文史。及辨擊上下古今事。愈出而愈無窮。向之所聞。其誠足徵矣。予方將資先生以進學。一旦忽

辭予曰。江風飕飕。歲聿云暮矣。昨夕夢梅花翹春鷺。以招我。某其歸歟。余曰。聞有先生舊矣。恨不一接。今弗久輒別。奈何。先生曰。吾髮雖種種。力尙強。子年亦未耄。惡知不久相從於山水之間乎。余因呼酒謂先生曰。三洞雙溪之勝。甲東州。三秀之芝。冰玉之薺。晝夜恆羅。生當與先生采之。先生若弗從予。有如此酒。先生復勺水以酢予。曰。陵陽敬亭。其紫翠蔚然在望。陶明府。庾內史。嘗往游焉。其遺跡尙有存者。吾將往焉。巢雲松而鍊精魄。子儻不我同。有如此水。於是相與大笑。抗手而別。

贈賈思誠序

同里張君以書來謂濂曰。壬辰之秋。兵發中原。大江之南。所在皆繹騷。時惟伯嘉納公。持部使者節。來涖浙東。慎簡羣材。官而任之。以保障乎一方。余雖不敏。公不以爲無似。俾攝錄事判官。判官職在撫治一城。生聚。凡其捍禦綏輯之策。不憚晝夜而勤行之。以酬公知遇之萬一。然節宣之功。不加日積月深。以勞而致疾。疾之初作。大熱發。四體中繼之以昏仆。迨其甦也。雙目運眩。耳中作秋蟬鳴。神思恍惚。若子子然離羣而獨立。若御驚飈而遊行大空。若乘不繫之舟。以簸蕩於三峽四溟之間。殊不能自禁。聞丹溪朱先生彥修。以醫名四方。亟延治之。先生至。既脉。曰。內搖其真。外勞其形。以虧其陰。以耗其生。宜收視返聽於太虛之庭。不可專藉藥而已之也。因屬其高第弟子賈君思誠。留以護治之。賈君卽視余如手足之親。無所不致其意。慮余怒之過也。則治之以悲。悲之過也。則治之以喜。喜之過也。則治之以恐。恐之過也。則治之以思。思之過也。則治之以怒。左之右之。扶之掖之。又從而調柔之。不特此也。其逆厥也。則藥其湧泉以寤。

之其怔忡也。則按其心愈而定之。如是者數年。不可一朝夕離去。寧食不鮮。羞衣不裼裘。何可一日以無賈君。寧士不魯鄒。客不公侯。何可一日以無賈君。余疾於是乎告瘳。而賈君有功於余者甚大矣。子幸賜之一言。多賈君之善。而昭余之不敢忘德於賈君。不識可不可乎。余發張君之書。重有感焉。世之爲民宰者。恆飽食以嬉。其視吾民之顛連。漠然若秦越肥瘠之不相維繫。非惟不相維繫。又鹽其髓。剝其膏。而不知止。孰有如張君勤民成疾者乎。世之醫者。酬接之繁。不暇雍容。未信宿輒謝去。至有視不暇。脉不暇方。而不可挽留者。孰有如賈君調護數年之久而不生厭者乎。是皆可書。余方執筆以從。文章家之後。此而不書。烏乎書。雖然。今之官政苛虐。敲朴椎繫。惟日不足。我民病此久矣。我瞻四方。何翰林乎。州邑之間。其有賢牧宰能施刀圭之劑。以振起之者乎。設有是。余雖不敏。猶能研墨濡毫。大書而不一書。是爲序。

贈孔君序

余來江寧之四月。與楊君某會於郡庠。楊君謂余曰。曲阜孔君克敬。宣聖五十五代孫也。通儒家言。習唐人古今詩。往往婉麗如晴葩。鬪春。能有餘妍。得言外含蓄之意。然猶患學之未充也。將負笈游大江之南。適監察御史安道調官江寧。遂與之偕來。居無何。南北道絕。遂莫能歸故鄉。青燈照影。孤坐寥闕中。思尼山之葱蒨。懷泗水之淵淪。未嘗不潸然隕涕。吾黨之士憐焉。子宜爲文以宣其沈鬱。庶幾有以底夫道也。余謝曰。克敬未余識也。余何以文爲。楊君曰。吾聞釋人之所難忘而能喻之。以至理者。唯文章之士則然。子幸終爲之。毋以不識其重辭也。余曰。人生霄壤間。坎止流行。曷嘗有一定哉。譬之西風木葉。飄實於川。

之中。其廻旋轉移。有直達長江者。有泊於石磯而栖於浮查者。有弗離其故處者。一委之自然而已。何所容其心哉。若膠膠泥於土著之間。殆非也。以克敬之家言之。其先本宋人。至防叔始奔於魯。遂爲魯人。其後裔亦不專居於魯也。太子少傅潛。則移於會稽。撫州守博太學博士端朝。則徙於信安。通城令端植。則遷於江夏。處士管。則分守臨川間。求其故。多因患難來奔。而寢成巨族。或以詩書擢進士第。或以政事列刺雄藩。或以文學主教庠序。章綬輝豔。後先相望。初不拘拘於泗水之懷。尼山之思也。雖然。父母之邦。親戚聚焉。墳墓存焉。遠而去之。豈人情所欲哉。第以世變之來。紛紜輻輳。有非智力之可爲。能存喘息而復齒於衆士。不翅足矣。他尙何憂哉。克敬之所憂者。則宜曰。我孔氏之子孫也。孔氏之道。大如天地。明如日月。信於四時。堅如金石。夫人之所當學也。況吾爲其後者乎。是則可憂也。克敬能若是。則雖闕里之遠。人孰得而愧之。脫有不然。雖衣博衣而立魯東門。日號諸人曰。我孔氏之子孫。亦君子之所不與也。克敬慎之哉。抑余聞九苞之鶴。決生於岐山之鳳。千里之駒。必產於渥洼之馬。用世之才。多出於神明之胄。克敬之賢。余知其不特通儒家言及能詩而已。負笈之志。蓋未艾也。他日道益凝。聲聞將日昭。江寧之有孔氏。其盛與信安江夏諸族等。又當自克敬始也。余之有望於克敬者。不亦遠乎。楊君曰。子言美矣。其理亦至矣。可以宣其沈鬱矣。盍書以贈之。余不敢辭。

贈梁建中序

虎林梁君建中。妙年嗜伊洛之學。而復有志於文辭之事。下筆滔滔數百言。不能自休。取而觀之。皆典雅

可玩。一時士大夫皆稱譽之。建中不自以爲足。復來問文於余。余也賦質凡庸。行志弗強。行年六十。曾莫能望作者之戶庭。間嘗出應時須。皆迫於勢之不能自己者爾。當何以爲建中告哉。雖然。亦嘗聞之師矣。文非學者之所急。昔之聖賢。初不暇於學文。體之於身心。見之於事業。秩然而不紊。粲然而可觀者。卽所謂文也。其文之明由其德之立。其德之立。宏深而正大。則其見於言。自然光明而俊偉。此上焉者之事也。優柔於藝文之場。壓飫於今古之家。搢英而咀華。遡本而探源。其近道者。則而效之。其害教者。闕而絕之。俟心與理涵。行與心一。然後筆之於書。無非以明道爲務。此中焉者之事也。其閱書也。搜文而摘句。其執筆也。厭常而務新。晝夜孜孜。日以學文爲事。且曰。古之文。淡乎其無味。我不可不加醴豔焉。古之文。純乎其斂藏也。我不可不加馳騁焉。由是好勝之心生。誇多之習熾。務以悅人。惟日不足。縱如張錦繡於庭。列珠貝於道。佳則誠佳。其去道益遠矣。此下焉者之事也。嗚呼。上焉者。吾不得而見之。得見中焉者。斯可矣。奈何中焉者。亦十百之中。不三四見焉。而淪於下焉者。又奚其紛紛而藉藉也。此無他。爲人之念弘。爲己之功不切也。余自十七八時。輒以古文辭爲事。自以爲有得也。至三十時。頓覺用心之殊。微悔之。及踰四十。輒大悔之。然如猩猩之嗜屐。雖深自懲戒。時復一踐之。五十以後。非惟悔之。輒大愧之。非惟愧之。輒大恨之。自以爲七尺之軀。參於三才。而與周公仲尼同一恆性。乃溺於文辭。流蕩忘返。不知老之將至。其可乎哉。自此焚毀筆硯。而游心於沂泗之濱矣。今吾建中孜孜綴文。思欲以明道爲務。蓋庶幾無余之失者。而余猶爲是強聒者。文之華靡。其溺人也甚易之故也。雖然。天地之間。有全文焉。具之於五經。人能於此。

留神焉。不作則已。作則爲天下之文。非一家之文也。其視遷固。幾若大鵬之於鷦鷯耳。建中尙勉之哉。建中尙勉之哉。

太史公生平以文章名天下。而其該貫羣籍。窮極經史。蓄積皆穰於古人爭長者。人未必盡知之。縱或知而尊之。至其立心制行。敦大和雅。揆諸聖賢之道而無媿者。世固未必識也。於其大者不之識。而謂足以知文章。豈果能得其精微之意乎。建中刻苦古學。老而不倦。亦可以觀公之取友。洪武二十三年春正月十日。門人謹題。

贈蕭子所養親還西昌序

天下之道。唯孝與忠。是謂秉彝。萬古攸同。矧惟成均首善之地。風動四方。罔不從化。其居是職者。其有不惕然自省者乎。昔陽城之爲司業也。立諸生館。下而誨之曰。人之爲學。忠與孝耳。諸生有久不省親者乎。明日謁城還養者二十人。諸生且爾。況爲其師者。苟鶴髮之親在堂。其心又將何如乎。此余於西昌蕭君之事。不能忘言也。蕭君名執。字子所。居武山之西。山形拔起如旌旗。浩翠淋漓。積自古初。土沃而泉腴。蕭君朝樵於白雲之山。暮而言旋。買鮮於溪。沽濁醪於東鄰。婆娑起舞。親側奉觴。上壽。親旣醉。蕭君亦微醺。拊手歌曰。武山崔崔。有雲英英。止武山如蓋。川流不停止。我奉我親。其樂莫與京。止樂兮樂兮。我衣之翩。我顏之頰。止蕭君之樂。無日不然。若將終身焉。會科目之興。有司強赴江西秋闈。名在前列。已而上南宮。選授國子錄。所授經皆公侯家之子。見蕭君能古文辭。皆心服之。業將成。蕭君獨有不豫色。然人問其故。

輒溘然墮淚曰。吾親髮盡白矣。臚氣下上不自寧矣。武山夜鶴曉猿。遲余歸久矣。於是走白丞相府。其辭甚切。吏拘於文墨。往來參稽。閱一歲而始報可。蕭君治行李將歸。激者曰。蕭君之所見一何果哉。抱卓犖之才。當用才之時。何不一試而歸。今蕭君之同官。或拜御史。或擢縣令矣。使蕭君少忍須臾。銅章青綬。豈不足以榮其親哉。贊善大夫宋濂曰。是惡足以知蕭君。蕭君不忘孝於親。其有不忠於君者乎。惟念成均爲首善之地。故不敢冒爵祿以失菽水之驩爾。不然。是有愧陽城之諸生矣。尙何足以言蕭君乎。銅章青綬之榮。子謂蕭君他日不爲之乎。激者無以對。於是出酒飲蕭君。率同志賦詩一章成。則蕭君爲之欣然引滿。頽然就醉。片帆西上。抗手而別。洪武六年六月二十四日。金華宋濂序。

贈朱啓文還鄉省親序

工部奏差朱旻啓文。旣書滿。將省親。虎林中薦紳家多發爲聲詩。吳府伴讀王驥與啓文有連。遂以首簡請予序。浙河名區。虎林甲郡。文彩朗耀。光衝於牛斗。才猷振拔。軫接於荆揚。故三沈有翹雋之聲。二徐爲俊髦之冠。多歷年所。匪惟今斯。粵自唐季以來。海田屢化。獨繁華之如故。慶光景之常新。富庶亞於咸陽。侈麗比於京洛。停鸞峙鵠。山川之靈氣鬱蟠。綺陌香衢。笙管之春聲宛澗。嗟士習之易染。憫風俗之頻移。儻有拔萃其間。實稱良彥。行必傳於紺素。譽徧播於公卿。惟朱氏之名家。愜輿情之所屬。塤篥交奏。四經之義。隨昭明。黼黻相宣。一姓之文。鋒犀利。棣萼旣形於周雅。芝蘭遽產於謝庭。華穎高審。允符二妙之選。藻思過發。何慙八斗之才。珠彩雖沈。玉光難掩。遂因文藝。上貢銓曹。雖王勃之少年。豈朱雲之可吏。廁

行人於起部。期試事於薇垣。三載積勞。行將授政。一朝予告。得遂榮親。服綵上堂。每賦高年之引。奉觴爲壽。尚瞻游子之衣。春暉澹蕩。以娛人。秋月連娟。而在戶。爭誇具慶。奚翹前蹤。平浦西風。催秦淮之急。漿遙天去雁。起名勝之長吟。不鄙衰孱。來徵序引。無山東之雅製。續洛下之羣賢。愧陳瓦礫。式聯寶卣。云爾。係之以詩曰。

松帷落秋陰。月魄淡涼夕。朝鼓官河棹。暮宿青山驛。憶昔爲行人。風雨尙征役。王事有程期。吾敢思燕息。今焉返吾廬。搖曳武林陌。上堂獻壽觴。踉蹌喜增劇。衣帶來時香。酒仍去年白。門前青桂枝。寒花破寥閨。不見近三年。爲我動顏色。子歸趣誠佳。子樂復何極。可憐城頭烏。肯倦西風翼。

贈吳府伴讀陳生孟陽序

君子爲學。能知內而不外。斯善矣。內則自任之重。而不失天分之正。苟區區務外。則奔趨竭蹶。何所不至哉。予自官京師。南北之學徒。頗有來受經者。旣而多攝御史。巡行郡國。而陳孟陽亦在其列。孟陽所蒞。光穎徐邳宿五州。官書浩穰。至萬餘卷。孟陽逐一爬梳。使枉者直。暴者馴。且察夫民病。請免夏賦之絲。頻役之軍。與夫輓運芻菑之艱。分給滯鹽之便。如是者數條。右御史大夫陳公卽以上聞。多有舉行者。已而同列之士。或擢左右參政。或典大郡。或僉各郡按察司事。人皆曰孟陽之材若是。其將自此升哉。孟陽適以疾請告。人爲孟陽惜之。孟陽則曰。爵祿之來天也。吾敢有微覬之心哉。且方岳之任至重。繭絲泉粟之殷。甲冑獄訟之繁。徵科營繕之勞。無所不當與。倘毛髮不至。是負國也。吾自度其才可與同列班乎。不可也。

幸仕優而學。拾級而升。庶幾無曠。官債事之失也。況吾母氏年近五十餘。日薄西山。素髮蕭蕭。然垂領。僑寓於婺城之間。吾心懸懸如飢。近已得請於上。躡履而迎之。以來。庶幾吾心安焉。不然。鍾鳴鼎食。以爲榮。結駟連茵。以爲侈。適足以增夫愧耳。予聞孟陽言。知有志君子者也。內而不外者也。拾級而升。而無躡進之望者也。思孝乎親者也。此贈別之言。所以不可不作也。

贈夏安禮序

樂昌丞廬陵夏君安禮。見余於京師。請曰。安禮嘗讀古人之文。見其聲烈垂於後世。若日月之在天。心甚慕之。然年已不逮矣。而每觀其同時之人。多託名於文辭之中。至今亦賴以不朽。一何幸哉。自意此由託得其人。而然。庶或可以自致。而先生信今之傳世者。願有以贈我。使得置名於其間。俾來世有聞焉。余告之曰。文辭固足傳世也。然非君子之所得已也。古之人道德備於身。遭時居位而推之於天下。若臯陶伊傅。初未嘗自有所著。而被其澤聞其風者。相與紀載其言語行事以傳。其次若管仲晏嬰。爲一國之政。亦未嘗著書以傳。而後之能言者。反假其名以取信於世。又其次若秦漢以下。將相之獲書於史氏者。或出於編章販繪之流。或起刀筆介冑漁鹽之間。計其人或目不知書。而口不能談。豈暇爲後世計哉。而卒之顯名者。其德行功業有足稱也。又如班氏所傳循吏。以及近代以循良稱者。未必皆自能言。亦未必託人爲紀述。而其事愈傳不廢。是豈偶致之哉。亦能盡其職而已。故任無崇卑。能盡其職。則榮於當時而傳於後世。今安禮思自致於烜赫。奚以他人爲哉。極乎材之所能爲。充其位之所得爲。則可矣。然世之治民者。

強者酷虐以立威。懦者弛緩以怠事。而汲汲惟其身之謀。是皆不顧來世者也。使稍卻慮深思。而惟恐其名之泯沒。則豈不慙且懼哉。安禮處乎下位。能不自卑而思善其名。亦可謂有志之士矣。夫士恆患無志。有志未有不至者。安禮昔嘗佐澄城。知武強。赫赫以政事聞。民交口稱之。繼自於今。苟能愈自奮厲。他日史氏紀循吏之績。以備國初之政。其在安禮也夫。其在安禮也夫。

贈張致中序

衡轡衡策。工之所以御馬也。馬非此則不足以致遠。然苟不用其力焉。未有能至者也。爵祿名器。人主所以御天下賢才之具也。有才之士。非假爵位。固不足以立功。然苟恃焉而不脩其職。其能成名者鮮哉。余嘗讀漢將相表。見四百年間。登名於簡冊者。以千百計。而余能熟其名者。僅數十人。他或無事功。不見於列傳。或不久輒罷。不及有所爲。至於今。則寂然無聞矣。余每爲之掩卷竊嘆。方其人在時。皆位於朝廷之上。與人主相唯諾。可否。其威權勢力。可以禍福一世。使一世之人。低首側足。不敢視其前驅。當其氣酣意得。語其故人賓客。亦未嘗不自必以爲傳世無疑。而今雖博聞多識者。且不能知之。況庸常之人乎。此其特焉而不知修職之過也。及觀卓茂魯恭之名。皆發於邑令。唐之元德秀。宋之邵子。張子之流。皆厄於下位。或布衣終其身。而名聲赫赫。昭宇內。雖小子婦人。皆習知而能道之。後世或跡其里。居官守所及之地。爲之立廟奉祀。與其人尙存不異。然後始大悟鄙陋無能者。雖爵位不能顯其名。豪傑之士。自立於天下者。固不待外物而後著也。而世或恃之以夸於人。則豈不惑哉。四明張君致中學甚富。義甚偉。有志於功名。

思推其所以澤物。其意甚美。繇奏差上書闕下論事。天子才之。擢爲宛平知縣。余嘉致中之賢。而欲見其功名之成也。故以所嘗歎者告之。使致中勿以位卑自忽。而益致思焉。然余固以德薄位尊爲懼者。亦可以爲戒也。

贈何生本道省親還序

世有恆言。閥閱之家。能守其田賦爲難。曰非難也。一愿款之人。足以易之矣。又以能保其闔廬。不失先人遺澤爲難。曰非難也。稍知承家之義。亦不致於覆墜矣。又以能傳龜襲紫爲難。曰非難也。爵祿之來。雖曰有命。或可以倖致。初不可以定論也。然則孰爲難。其在紹詩書之業。而有光前人乎。前人之嚙嚙道真。吾則兀然如嚼蠟丸。前人之立言契道。吾則瞭然如立土偶。縱使入有田廬。出膺廕仕。惡在其爲賢子孫也哉。吾於何生之事。不能無感焉。生字本道。北山先生文定公諸孫也。先生嘗宋之季。侍宦臨川。獲從考亭高第弟子黃文肅公。傳伊洛正宗之學。首喻真實刻苦之訓。繼聞浹洽四書之旨。精力旣久。道凝德立。威嚴莫犯。有如泰山之干霄。和氣充牣。儼若陽春之煦物。故其學一傳爲王文憲公。再傳爲金文安公。三傳爲許文懿公。聯蟬散彩。焜耀後先。使吾婺爲鄒魯之俗。五尺之童。皆知講明道德性命之學者。先生之功也。在他人夙夜孜孜。欲儀型其萬一。況其子若孫者乎。生嘗從事科舉之業。受鄉薦矣。會年始踰冠。上命肄業成均。此天之玉汝於成也。向使合試南宮。幸擢一第。卽隨牒浮沈州縣間。而學不暇講矣。學未成而仕。寧不犯古之明戒哉。生今幡然改轍。唯乃祖之學是繼。斯善矣。繼之之道云何。心欲其大也。萬象無不

涵也。理欲其精也。無一髮之不窮也。氣欲其平也。勿使粗暴之干也。形欲其踐也。毋徒爲空言以警世也。文辭足以溺志也。非關名教。絕之而勿爲也。異端小道。或可觀也。屏之斥之。唯恐蹈之也。如此。則庶幾乎近道矣。生其昂之哉。生在成均。援舊比歸省。二親前。御史中丞誠意伯劉公。參知政事陶公。嘉生有學而有文。首爲詩以華其行。而詞林冑監之英。記注給事之臣。郎官藩僚之賢。方外名德之士。又各分題聯什而請予爲之序。嗚呼。闕閱之家。賢子孫能紹書詩之業者。予不於生望之。而執望之哉。生執經從予學者頗久。予故肆口極言之。若夫予告省親。孝子常事爾。茲可略云。

贈高麗張尙書還國序

皇上誕膺寶歷。威服德懷。萬邦黎獻。共惟帝臣。時則有若高麗處於海東。遣使者奉表稱臣。貢獻方物。上嘉其誠。詔錫以靈書金寶。仍爲高麗國王。且錫以王者禮樂。使祀宗廟山川百神於國中。王感上恩之優渥也。事大之禮。弗懈益虔。今年春。復遣工部尙書張子溫來朝。上御奉天殿見之。侍儀使自殿中傳宣問王起居。且勞子溫跋涉之故。皇情謙抑。在古所無。即日錫燕於會同之館。翌日東朝。命侍臣饗之。自時厥後。中書樞府暨御史臺。次第而舉酒觴。流行伎樂交作。酣暢和適。禮意有加焉。夫以皇明天覆地載。四裔君長。孰不重譯來庭。使節之往來。琛賚之充牣。無月無之。而於海東之使。禮遇尤厚者。其故何邪。他國之君長。非不有用其土地人民。狃夷俗而蔑禮義。聘其詐力。惟日不足。高麗乃箕子胥餘之邦。上有常尊。下有等衰。實存先生之遺風焉。正當以中夏視之。未可以外國例言之也。矧今聖天子在上。雄兵百萬如雷。

如霆有抗之者。無不殞滅。然於守禮之國。必寵綏而懷柔之。唯恐有所不及。而高麗之君。亦知天命所屬。雖在數千里之外。遙瞻天威。僅同咫尺。致使海東之民。安於田里。而弗知戈甲之警。含哺而嬉。鼓腹而游。無異承平之時。是所謂君臣交盡其道者也。不亦美歟。抑予聞宋之徐兢。嘗往其國。其國有禮部尙書金富弼者。與其弟富轍。博學善屬文。而進趨詳雅。兢以綽有華風稱之。今子溫之來也。應對精明。進退有度。而文采粲然可觀。似無愧於前二子者。使不賢而能之乎。因其臣之賢。則其國君之賢。益可信矣。子溫之還。大夫士多詩之。予因總修元史。不暇與子溫接。頗樂聞其事。而爲之序云。

贈醫師葛某序

古之醫師。必通於三世之書。所謂三世者。一曰針灸。二曰神農本草。三曰素女脉訣。脉訣所以察證。本草所以辨藥。針灸所以祛疾。非是三者。不可以言醫。故記禮者有云。醫不三世。不服其藥也。傳經者既明載其說。復斥其非。而以父子相承三世爲言。何其惑與。夫醫之爲道。必志慮淵微。機穎明發。然後可與於斯。雖其父不能必傳其子也。吾鄉有嚴生者。三世業醫矣。其爲醫專事乎大觀之方。他皆憤憤絕弗之省。又有朱聘君家世習儒。至聘君始以醫鳴。醫家諸書。則無不精覽。一少年病。肺氣上喀。喀鳴喉中。急則唾。唾血成縷。嚴曰。此瘵也。後三月死。聘君曰。非也。氣升而腴。中失其樞。火官司令。燦金於爐。是之謂肺痿。治之生。已而果成生。一六十翁患寒熱。初毛灑淅。齒擊下上。熱繼之盛。如蒸餽。嚴曰。此痰也。不治將差。聘君曰。非也。脉淫以朮。數復亂息。外疆中乾。禍作福極。是之謂解休。藥之則瘳。不藥則劇。已而果劇。治乃愈。一女

婦有噦疾。每吐涎數升。腥觸人。人近亦噦。嚴曰。此寒噦也。法宜溫。聘君曰。非也。陽陰未平。氣苞血聚。其勢方格。靡有攸處。是謂之惡阻。在法不當治。久則自寧。且生男。言後輒驗。夫嚴生之醫三世矣。聘君則始習爲之。而優劣若是者。醫其可以世論否耶。嗟夫。昔之名醫衆矣。未暇多論。若華元佗。若張嗣伯。若許智藏。其治證皆入神。初不聞其父子相傳也。自傳經惑於是。非使禮經之意晦而不自。三千年矣。世之索醫者。不問其通書與否。見久於其業者。則替替焉從之。人問其故。則曰。是記禮者云爾也。其可乎哉。葛生某。淮之鉅族也。明於醫。三世之書。皆嘗習而通之。出而治疾。決死生。驗差劇。若燭照而龜卜無爽也者。士或不能具藥。輒注之。不索其價。士君子翕然稱譽之。名上丞相府。賜七品服。俾提舉諸醫官。有疾者遂倚之以爲命。嗚呼。若葛生者。其無愧古之醫師者歟。

贈醫師賈某序

醫之爲道。難言久矣。然必審診以起度量。立規矩。稱權衡。合色脈。表裏有餘不足。順逆之法。復參其人之動靜。與其息之相應。然後從而治之。則其事爲甚不輕矣。非洞明應世羣書之得矣。尙可與於斯乎。黃帝內經。雖疑先秦之士。依倣而託之。其言深。其旨邃。以弘其考辨信而有徵。是當爲醫家之宗。下此則秦越人和緩。無書可傳。越人所著八十一難經。則皆舉內經之要而推言者也。又下此則淳于意。華佗之熊經鷗願。固亦導引家之一術。至於刳腹背。滿腸胃而去疾。則涉於神怪矣。意之醫狀。司馬遷備志之。其所謂迴風杏風者。今人絕不知爲何證。況復求於治療之深旨乎。又下則張機。機之金匱玉函經。及傷寒諸論。

誠千古不刊之典。第詳於六氣所傷。而於情欲食飲罷勞之所致者。略而弗議。兼之文字錯簡。亦未易以序次求之也。又下此則王叔和。叔和纂岐伯。華佗等書爲脉經。敘陰陽內外。辨三部九候。分人事氣口。條陳十二經絡。洎夫三焦五臟六腑之病。最爲著明。惜乎爲妄男子括以膚陋之脉歌。遂使其本書不盛布於世也。又下此則巢元方。其病源候論。似不爲無所見者。但言風寒二溼。而不著溼熱之文。乃其失也。又下此則王冰。冰推五運六氣之變。撰爲天元玉策。周詳切密。亦人之所難。苟泥之。則局滯而不通矣。又下此則王壽孫。思邈。思邈以絕人之識。操慈仁惻厚之心。其列千金方。翼及工害人之禍。至爲憤切。後人稍闡其藩垣。亦足以其術名。但不知傷寒之數。或弗能無遺憾也。壽雖閭劣。外臺祕要所言方證符禁灼灸之詳。頗有所祖述。然謂鍼能殺生人。而不能起死人者。則一偏之見也。又下此則錢乙。龐安時。許叔微。叔微在準繩尺寸之中。而無所發明。安時雖能出奇應變。而終未離於範圍。二人皆得張機之粗者也。惟乙深造機之闡奧。而擷其精華。建爲五藏之方。各隨所宜。肝有相火。則有瀉而無補。腎爲真水。則有補而無瀉。皆啓內經之祕。尤知者之所取法。世概以嬰孺醫目之。何其知乙之淺哉。其遺書散亡。出於閩孝忠所集者多。孝忠之意。初非乙之本真也。又下此則上谷張元素。河間劉光素。睢水張從正。元素之與光素。雖設爲奇夢異人。以神其授受。實聞乙之風而興起焉者。若從正則又宗夫光素者也。元素以古方新病。決不能相值。治疾一切不以方。故其書亦不傳。其存於今者。皆後來之所傳會。其學則東垣李杲深得之。杲推明內外二傷。而多注意於補脾土之說。蓋以土爲一身之主。土平則諸臟平矣。從正以吐汗下三法。風

寒暑溼火燥六門爲醫之關鍵。其治多攻。其劑多峻厲。不善學者殺人。光素論風火之病。以內經病機氣宜十九條著爲元病式。簡奧粹微。有非大觀局諸醫所可彷彿。究其設施。則亦不越補攻二者之間也。嗟乎。自有內經以來。醫書之藏有司者。凡一百七十九家。二百九部。二千二百五十九卷。亦不爲不多也。他未遑深論。卽今所論者言之。世之醫師果能盡心於斯否乎。脫或未盡心於斯。則夫起度量。立規矩。稱權衡。合色脉之屬。焉能察而行之。不至以人命爲戲也幾希矣。雖然。亦有要焉。逆與順之謂也。曰升降。曰浮沈。吾則順之。曰溫涼。曰寒熱。吾則逆之。果能此道矣。則去夫先醫之所治。雖不中不遠矣。然又未易以一蹴至也。非求之極博而觀其會通。安可遽反於至約之域乎。醫之道所以難言者。蓋若此而已。烏傷賈思誠。濂外弟也。性醇介。有士君子之行。嘗同濂師事城南。聞先生學治經。久之。思誠復去。受醫說於彥修朱先生之門。諸儒家所著無所不窺。出而治疾。往往有奇驗。薦紳間多爲賦詩而屬濂以序。濂非知醫者。將何以爲思誠告哉。而思誠請之不倦。因爲直疏歷世羣書之得失。而勗思誠以學者如此。初不暇如他作者。簸弄筆舌。交錯以成文也。

贈傳神陳德顏序

余方退朝。忽起曹員外郎劉君宗文。同一儒生見過。指曰。此吾學子松陽陳德顏也。德顏善描真。小與大咸宜。請爲先生試之。余所遇畫神者。亡慮數十。有絕不得形似者。有僅得髣髴而不能全者。形雖肖矣。又有不得其風神。如道家所繪仙靈者。竟無以稱吾心。不欲拂宗文之意。姑諾之。德顏反覆睥睨之而去。越

明日德顏持一小像來。余不能自見。揭諸壁間。僮隸見之。謹曰。此吾主翁也。俄門弟子至。又爭曰。此我家先生也。自時厥後。僚友好我者。聚而觀之。僉曰。此龍門子宋君也。予亦自笑。因叩之。一云是舍杖而趨。觀水潛溪時歎。一云非也。是破顏微笑。肆口論文時歎。一云亦非也。是冥心合道。與造化游時歎。余曰。有是哉。脫如三客言。非惟其形逼真。抑且并性情而傳之矣。曾未幾何。宗文又再至。余因與道客語。宗文曰。京都之間。天下藝能之所萃止。如德顏者。十百之中。僅一見焉。先生既愛之矣。盍爲文以張之乎。余自近歲以來。爲求文者。肩摩袂接而至。一切謝絕已久。聞宗文言。欣然揮毫爲之。藩府宰輔之賢。詞林胄監之英。臺閣清流之選。以余延譽之。故亦競賦詩畀之。德顏何以得此於人哉。蓋君子所業。但憂心弗純。不患藝不精。但患藝弗精。不憂名不揚。理之常也。古之人以畫鬼神爲易。狗馬爲難。狗馬人皆識之。不類則非之。鬼神不與人接。奇形怪狀。可怖可愕。任其意爲之。況人爲物靈。其變態千萬。一毫不類。則他人矣。不其尤難哉。非德顏之藝精者。不能與於斯也。余於德顏竊有所感焉。史氏之法。不溢美。不隱惡。必務求其人之似焉。一毫不類。亦他人矣。奈何世道不古。揚之則升青霄。抑之則入黃墟。問其氏名。則是矣。其行事則非也。嗚呼。一藝且然而操直筆者。乃不能然。豈不有愧於德顏哉。余論激矣。宗文以爲何如。

贈陸菊泉道士序

吳下道士陸永齡。好養生之說。別號曰菊泉。徵言於予曰。永齡聞菊之爲華。得陽氣最盛者。古人謂之日精。屈子好神仙。賦遠遊。嘗餐其落英。後世有飲南陽潭水而得上壽者。則菊誠可以延年也久矣。永齡誠

樂而慕之。故以菊泉爲別名。先生以爲何如。余曰。菊固可以延年也。雖然。吾觀昔之神人。若廣成子。安期生之流。至今數千載。猶時時往來東海諸山間。凌日月而薄陰陽。視天地如一粟。以千載爲俄頃。其壽可爲長矣。其人初曷嘗餐菊飲水而致然哉。亦善於自養而已。夫人備五行之氣。以成形。形成而精全。精全則神固。誠能體乎自然。而勿汨其中。勿耗其神。勿離其精。以保其形。大可以運化機。微足以閱世而不死。豈特致上壽而已乎。雖然。此道家之說也。吾亦有所謂不死者。書契以來。可謂久矣。凡聖賢豪傑之士。至今儼然具乎方冊間。其事業可爲世法。言語可爲世教。國用之則興。家用之則和。人身用之則修。或反其道。敗亡可立見。自今而往。天地無有窮也。其壽亦無有窮也。豈廣成安期之儔所能及哉。又何以菊泉爲哉。永齡年少好學。苟未至於此。亦當以廣成安期自勉。無以菊泉爲足恃也。吾之身善治之。可以亘終古而長存。與三光俱不泯沒。不能養之。特蚊蚋起滅。蠶盎中耳。豈不惑哉。於是永齡謝曰。先生教我矣。請書之而願學焉。

羅氏五老圖詩卷序

明之慈溪羅氏。出於唐觀察判官隱之子塞翁。塞翁來攝縣令。因家焉。至宋有名明復及謙者。相繼擢第。奉常。蔚爲書詩之家。然而謙之後人。多以耆壽稱。其諱綱者。年八十有四而終。綱之子善卿。其卒之年。如綱而不及者。再葦。善卿娶某氏。生五男子。其一曰明遠。年八十又三。次二曰明傑。其年如明遠而少二歲。次三曰明德。其年如明傑而少十又三歲。次四曰明純。次五曰明叔。明純如明德而少二歲。明叔如明純。

而少三歲。惟此五老人者。高邁八表。卑踰六旬。當風日和美之時。婆娑中庭。衣冠偉如。珮玉鏘如。于于而趨。雍雍而語。皓髮龐眉。照耀後前。華帔綵衣。給事左右。見者驚詫。不曰此人世之上瑞。則曰是國家之休禎。嗟嘆慕豔。若有所不及。噫。亦異哉。昔者睢陽固嘗以五老聞矣。其系非一姓。其生非一門。不過仕焉而止。優游鄉梓。相與賦詩倡酬。人猶以爲異而傳之。今羅氏則一姓也。非直一姓。又出一門焉。豈惟一門。又連弟若兄焉。然兄弟之親。有一從者。有再從三從者。有羣從者。不能必其同也。又同出於一父母焉。揆於睢陽之所聞。不爲尤異者歟。尤異之事。可不彰而傳之歟。藉曰睢陽之傳。皆以爵顯。而羅氏則隱約於布衣。然爵祿有命。不可以倖致。顯弗顯固不當計也。嗟夫。人生至欲者莫踰於壽考。書之九五。福舉以爲首。詩人善頌。雖不一而足。尤以此爲至願焉。羅氏一門。獲之爲多。誠稀世之盛事。厥今之奇逢。是宜材士大夫播諸聲詩。牘累篇聯。繩繩猶未已也。他日協諸律呂。被于管絃。使其子若孫。持觴爲五老人壽。非特爲一時之美談。觀風之使。或采而上之。則牛酒之寵勞。絮帛之敷錫。天光下照。赫奕於東海之濱矣。猗歟休哉。顧序睢陽之事者。錢公明逸也。明逸之文雄。故能傳諸久遠。若予荒靡不振之作。將焉用之。要不足爲羅氏之重輕。姑述其槩於首簡。以俟如明逸者刪焉。羅氏五昆弟。生子二十二人。共爨而食者五世。至正初。以同居善德。旌其門。予嘗求其故。綱攷攷樂善。惠利及人者衆。善卿生平不害物命。其好施如其父。歲儉則散粟給宗族。無死徙之憂。臨歿又聚借貸諸券焚之。然其所培植者遠矣。

樽散雜言者。金華許君存禮所賦之詩也。予嘗獲而讀之。愛其取法比興。有近於古作者。謂存禮曰。當今之詩。予頗得縱覽。求其如君者。百十之中。僅一二見焉。非三十年磨濯光精。而宜嚶靈蘇。烏能如美渠出水。弗沾纖塵。有如此者。世俗董腸溺胃。壓飢肥醜。未必能知君。然而至寶不可使埋光而韜采也。予當爲君序之以傳。已而存禮俾侍史錄其全集。示予於龍門山中。因爲之言曰。詩至於三百篇而止爾。然其爲體有三經焉。有三緯焉。所謂三經者。風雅頌也。聲樂部分由是而建。所謂三緯者。賦比興也。制作法裁由是而定。故周官大師之教國子。必使之以是六者。三經而三緯之。所以聆其音節之詳。玩其義理之純。養其性情之正。詩之爲用。其深且大者。蓋若此。嗚呼。學詩者。其可不取之以爲法乎。學詩者。固不可不取之以爲法。若夫出品裁之正。合物我之公。高不過激。悲不傷陋。則論詩者。又可不倚之以爲權度乎。夫詩一變而爲楚騷。雖其爲體有不同。至於緣情託物。以憂戀懇惻之意。而寓尊君親上之情。猶夫詩也。再變而爲漢魏之什。其古固不逮夫騷。而能辨而不華。質而不俚。亦有古之遺美焉。三變而爲晉宋諸詩。則去古漸遠。有得有失。而非言辭之所能盡也。嗚呼。三變之後。天下寧復有詩乎。非無詩也。詩之合於古者。鮮也。何以言之。大風揚沙。天地晝晦。雨雹交下。萬彙失色。不知孔子所刪之者。其有若斯否乎。組織事實。矜悅葩藻。僻澁難知。強謂玄祕。不知孔子所刪之者。又有若斯否乎。牛鬼蛇神。騁姦眩技。龐雜誕幻。不可致詰。不知孔子所刪之者。又有若斯否乎。如是者。殆不可勝數。孔子吾徒之所願學者也。孔子之所取如彼。而後之作者。乃如此。尙得謂之詩矣乎。唐宋諸名家。其近古者。固不可絕。謂無之而不及乎爾者。抑何其多。

也。今世之以詩鳴者，蠶起而泉涌，其視唐宋又似有所未逮。姑置之勿論。閒有倡爲江南體者，輕儇淺躁，殆類閭閻小人，驟習雅談而雜以褻語，每一見之，輒閉目弗之視。詩而至於使人弗之視，則其世道之甚下也，爲何如哉！此予於存禮之詩，不覺深爲之喜，而繼之以歎也。嗚呼！使自一鄉達之於一邑，自一邑達之於一州，自一州達之於四方，咸有如存禮者焉，則詩之道庶幾其復古乎！予雖不能詩，而論詩頗謂有一日之長，因愛存禮之作，不待請而自爲序之，非深於詩學者，殆未有以知予意之所存也。

葯房樵唱序

序曰：葯房樵唱者，吳公文可所著之詩也。夫詩在堪輿間，無纖弗囿，無鉅弗涵，太極陰陽之化，物則民彝之懿，煙風月露之形，河山草木之昭，氣候燠寒之更，毛羽鱗介之蕃，治亂興亡之著，夭壽死生之變，可疑可存，可悅可愕，可感可慨，外觸乎物，內發乎情，情至而形於言，言形而比於聲，聲成而詩生焉。譬之氣至簧鼓，神合自然，機搖弩發，道契冲漠，上自王公卿士，下逮小夫編氓，率藻暢於襟靈，一導揚於隱伏，大而朝會燕享，被之弦歌，小而委巷深閨，見諸譎諫，雖位號之或殊，而情衷之無異。商周之隆，斯義爲盛，漢魏以來，古意漸削，下沿唐宋之間而得之者，蓋鮮矣。於是吳趨楚豔，而哇淫之咏汨焉；牛鬼蛇神，而誕幻之事彰焉；靈飛霰擲，而粗厲之文布焉；胡嘖梵吟，而忽荒之趣見焉；僞言粵語，而俚鄙之褻形焉；鴛支蝶卉，而留連之思滯焉。詩道亦幾乎熄矣。公嘗與濂劇論至斯，爲之彈指三歎。蓋公以雄逸之資，濟通明之識，著於篇翰，規倣風雅，鼓動江山之氣，發揮造化之微，味玄酒於周廷，襲懸黎於梁苑，雕龍彩鳳，不足爲之。

麗。衝飈激浪不足爲之豪。其淒婉也。則孤猿夜號。松露初滴。其雅馴也。則冠冕佩玉。儼趨廊廟。由其才無不兼。所以體無不備。世之讀者。如入玄圃而覽明月。木難之珍。如登崑丘而覩天禾。肉芝之貴。誠可謂擅美制作之林。競爽藝文之場者已。如濂不敏。年踰四表。學廢三餘。精神遐漂。無永寧之夢。金石相宣。乏荆潭之情。景伯之舌。徒存。文通之筆。已失。顧念疇昔。獲陪杖履。濯纓雙溪之側。漱齒靈源之上。攀蘿月以夷猶。撫澹雲而舒嘯。公時吞吐羣機。陶鎔庶彙。珠玉隨風。冰雪在口。人爭傳於秀句。價欲等於兼金。奈何稍歷星霜。遽分今古。雖瀼西之室。遺跡未寒。而遼東之鶴。一去不返。尙忍言哉。尙忍言哉。公之子履與其門人黃琪編輯遺藁。鏤之文梓。乃緣世契之深遠。以首簡爲屬。嗟夫。玉光劍氣。直出人閒。麟角鳳毛。終爲世瑞。蕭功曹之新章不泯。李奉常之妙什宜傳。此理之常。無足疑者。第以疾疢相仍。文藻衰落。無義山之雅製。序漫叟之雄篇。姑綴蕪辭。以信微臆云爾。公諱景奎。文可字也。婺蘭溪人。羣行存諸別傳。履博學善屬文。尤精於詩。無忝於公者也。至正十八年歲次戊戌三月己亥朔。契家姪金華宋濂謹序。

筆記序

世之爲士者。貴於立言。然言不可以徒立也。必依乎經史而爲之。辨證雖或未遑。竭其終始而具釋全書。所以發越其光晶。而疏通其晦塞者。其爲來學寤疑辨惑之助。而功不旣多矣乎。漢魏以來。藝文之流。伸其獨見而成一家言者。亡慮數百。原其所志。亦未必不由於斯道也。奈何俗學紛紜。而莫之有定。鶩高遠者。宗恍惚而談玄虛。尙靡麗者。騁浮辭而矜縹製。譬諸金貝珊瑚。木難火齊。可珍之物。出橐而紛葩。升槃

而回縈。非不燁燁可觀也。然而寒焉不足爲之衣。飢焉弗能爲之食。求其若菽粟布帛之濟於用者。曾何如哉。嗚呼。弊也久矣。金華侍講黃公潛。以文辭冠於一代。藏諸金匱。勒於樂石。既已播厥中外。晚又出其緒餘。隨筆志之。號曰日損齋筆記。凡經史奧旨。昧者顯之。譌者訂之。辭雖優柔。不迫而難決之疑。久蔽之惑。皆渙然而冰釋。其據孔氏之傳。而以八卦爲河圖。辨僧瑩之妄。而知熙陵爲仁君。此尤超然自得之見。揆之於用。殆猶布之與帛。菽之與粟者歟。其異可珍之物。名雖貴而實有不足者歟。非攬之於至博。而約之於至精者。不可以與於此歟。昔者宋景文公祁。嘗著筆記一編。以釋俗。考古。雜說。析爲三門。而上虞李術。指其瑕疵者七條。近代紫陽方公回。亦著筆記一百六十餘條。而河南張恆時。斥其非。二公素稱該洽。而其所失。有如斯者。此無他。博焉而不及精之故也。嗚呼。必若公之此書。然後庶幾無遺憾哉。所可惜者。公之胸中所存。宜不止此。而耄年之加厄。於求文者之膠葛。竟不能有以盡筆之也。雖然。味滄海者。一滴而知鹹。采鄧林者。一章而知材。苟能因公之所嘗言。而推見其所不言。斯可謂善學者已。濂從公游者最久。既受此編以歸。迺私序卷端。眞諸篋衍。而擇善學授焉。至正甲午春正月望日。門人同郡宋濂謹序。

宋學士全集卷之十

傳

太白丈人傳

文中子學既成。慨然有濟蒼生之心。欲尊王道。推霸略。稽今驗古。建太平十二策。與河東薛收。西遊長安。見隋君。道經太白山。息於灌木之陰。有丈人自東來。縵袍無表。顏色腫噲。肩負束芻。去文中子。靳十步。弛擔箕踞而坐。兩手搔爬。眼視雲漢。若四傍無一人者。搔已。芻指文中子。謂收曰。彼鳳頸龜背。須垂至腰者。爲誰。收對曰。河汾王夫子也。曰。其王通耶。曰。然。曰。將何之。曰。夫子憂世未治。以策西見隋君耳。丈人大笑不止。文中子異之。乃捭衣趨前。揖而問曰。丈人何哂通也。豈通未聞先王之道。不足以威和萬民乎。丈人曰。不然也。豈八殞之大利害如牛毛。有非一士之舌可盡乎。丈人曰。不然也。豈上天未欲平治天下。而下民不當見大道之行乎。丈人曰。不然也。曰。三者既非。敢問丈人所哂者何事耶。丈人曰。嘻。何子愚之甚也。夫具人之體。服人之服。食人之粟。脫使稍有知。孰不欲堯舜君民哉。是有道焉。不可苟而就也。文中子曰。其道何如。丈人曰。道有三。其上焉者。燮和乾坤。經緯星辰。樞機四時。輶轄五行。執玉之德。以牖帝明。以達帝聰。然其自任以斯道之重。非人君北面而事之。不復輕出。出則必爲帝者師。若堯之君。舜之務。成昭禹之西王國。是已。其次焉者。以六合爲一家。以四海爲翰蕃。以五嶽爲封鎮。以元后爲父母。以臣鄰爲伯仲。以蒸庶爲赤子。煦以深仁。財以正義。防以峻禮。陶以至樂。威以嚴刑。式以庶政。治天下可運之掌上。然

亦不輕於自試。必待王者致敬盡誠。而後起而佐之。否則樂耕漁以終其身。若成湯之伊尹。周之太公望。是已。其下焉者。仿徨局束。呶訾栗斯。不遠千里。銜己求媚。君門如天。無路可陟。俯伏闕下。魄遁神疲。闈隸見訶。不敢出氣。此不自重惜。而徇時射利者之所爲。若齊王之門。操瑟而售者。是已。今子之西來也。欲爲君疇務。成昭西王國乎。欲學伊尹太公望乎。抑欲同售瑟於齊王之門者乎。子須麈具在。寧不知所自處也。且子獨不聞之。三家之市。有處子焉。必待行媒始相知名。又必待納采。問名。納吉。納徵。請期。親迎。而後始成昏。不然。是奔也。雖國人皆知賤之矣。子今負策而干進。恐與不待聘而奔者。無大相遠也。況隋君天性沈猜。不悅詩書。廢棄學校。殺戮元勳。溺寵廢嫡。惟婦言是用。惟刻薄毒痛之法。是崇是嗜。蕭牆之禍。起在旦夕。子尙欲行王道乎。言暴虐於湯武之世。必見誅。談仁義於桀紂之朝。必見黜。何也。時不同也。子如解吾言。卽請東轅毋西向。不然。則子其行哉。文中子曰。丈人之論至矣。通何敢不敬承明訓。然竊有疑焉。願丈人卒教之也。昔孔子大聖也。車轍環於諸國。棲棲遲遲。如喪家之狗。至再逐於魯。削迹於衛。窮於齊。圍於陳蔡。而卒不悔者。誠畏天命而悲人窮也。今丈人教通以不仕。然則孔子不足法歟。丈人曰。是何言與。是何言與。在孔子則無可無不可。下孔子一等。則可其所可。不可其不可。子自視其孔子耶。抑下孔子一等者耶。昔魯男子善學柳下惠者。蓋以其不可而學其可也。子聞子嘗受書於李育。學詩於夏璜。問禮於闞子明。正樂於廡汲。考易於王仲華。而其知顧出魯男子下。子竊爲子不取也。夫不察時而冒進。謂之瞽。施之不當。其可謂之愚。不度德量力而強行。謂之固。枉己從人。謂之賊。淪溺值回而弗止。謂之淹。瞽則

不達。愚則不周。固則不變。賊則不正。淹則不振。是五垢者。子皆躬蹈之。宜乎有疑於予。予去子矣。予去子矣。丈人言畢。負芻而行。文中子面如死灰。遠望丈人。南行不見。其背目猶不暫捨。薛收進曰。夫子何慕之深耶。收聞不合先王。不順禮義。謂之奸言。雖辯。君子不聽。彼丈人不過姦言而辯者爾。初未聞先王之道。夫子衝冒風露。跋涉而至此。終不因其說而中返乎。文中子遂行至隋。隋君御太極殿。文中子以太平十二策上之。隋君下公卿議。公卿多不悅。文中子退而嘆曰。丈人其至人哉。於是賦東征之歌而歸。著續經數萬言。君子曰。甚哉。出處之難也。以河汾之賢。操經綸之具。施之天下。何不可者。而丈人方詆其自售。斷斷不恕。況其下者乎。甚哉。出處之難也。

雜傳九首有序

婺爲浙水東大郡。自昔人物多出其中。載諸史冊者。旣或謬誤而不載者。又將湮沒無聞。濂竊病之。欲分道學。忠義。孝友。政事。文學。卓行。隱逸。貞節。八類。作先民傳。以示鄉之來學。荏苒沈痾。竟不能遂志。近幸少瘳。因自劉滂而下得九人。皆史官之所略者。謾敘其大槩。而附以贊辭。俾侍史錄。冀別稿。俟他日書成。卻隨類以附入焉。傳直書名而不諱者。蓋史法當爾也。南山樵者宋濂自引。

劉滂傳

劉滂字德霖。武義人。滂自少誦說。能屈其師。與浦江梅執禮同游。學人士多傾下之。號東梅西劉。中大觀己丑。進士第。調新昌縣令。縣在豫章山中。俗嗜鬪。令到官。輒移病去。以他吏攝之。滂臨以誠。未幾稱治。雖

傍邑訟不能決者。乞從滂決之。豪鄒氏橫里中。挾貴嫺。誣人死。滂捕致械治之。部使者爲請不聽。卒傳以法。投豪于相州。蔡京與滂祖爲布衣交。滂至京師。京曰。吾故人有孫耶。除詳定敕令所。刪定官。欲挽滂爲黨。會常環書詩屏間。京疑其訕己。屬滂求其迹。且遷官。滂笑曰。此胡爲及我哉。京聞之不悅。滂亦拂衣去。坐是不調者十餘年。靖康初。詔除太常博士。不拜。建炎中。上問人才於近臣。學士詹義給事中汪藻舍人李公彥皆云。滂可用。用滂。知建昌軍。建昌舊守多懦夫。威權不立。兵習悍驕。邀求無度。滂至。一以法繩之。兵不勝其忿。持戟入市掠人物。卽拒者刺傷之。滂捕係追償。兵遂爲變。滂及母妻皆死。時紹興甲寅七月三日也。滂卒。時年五十六。其妻湯氏侍姑側。兵及身猶不去。竟遇害。建昌人聞滂死。皆慟哭失聲。踰期。父老猶會佛祠哭之。有欲絕者。且千里以書弔其孤。朝廷旣誅始亂者。復用御史言。褒滂爲朝請大夫。官其一子壻。滂好學。善屬文。與人交終始如一。聞有急。傾財赴之。居官嫉惡如仇。毅然不可回奪。以及於難云。贊曰。

劉氏初居七閩。五代之季。有汝明者。遷永嘉之荆溪。生四子焉。孟與仲隨父居。季移三衢。幼曰器。來徙武義。滂之六世祖也。荆溪之顯者。則太常少卿安節。給事中安上。入河南。從伊川程頤游。所學甚粹。人稱二劉先生。武義之顯者。世有其人。其登進士第。則自滂始。而通判楚州嘉成。甌寧宰三傑繼之。後來者復接踵而起。多以善政聞。歲時燕饗。軒蓋繽紛。青紫間錯。當時以爲盛事。然君子之論。則在彼而不在此也。

鞏豐字仲至。其家鄆之濱城。渡江卽所寓。上斷爲武義人。曾祖燾。祖庭芝。皆左承議郎。庭芝世號山堂先生者也。父灑。鄉貢進士。前此科目相傳七世矣。豐學敏而早成。自童丱時。前輩源緒。古今音節。事之因革。總統如注水千丈之壑。迎前隨後。宿艾駭服。以爲積數十年燈火勤力。聚數十家師友講明。猶不能到也。時新迪義理之學。草茅士震於見聞。多矜露怙狃。至他文史言論。儒之藝業。又昧陋顛倒。莫知幅程。獨豐抑縱開闔。條疏品彙。應變不迫。富若素有。著之於文。無險怪華巧。而以理屈人。片辭半牘。皆清朗得言外趣。尤工爲詩。多至三千餘首。淳熙辛丑。以太學上舍對策高第。教授漢陽軍。代還。舊比皆自學入館。有不善之者。讒授江東提刑司幹辦公事。遭母喪免。又授浙東。會改法。本路人不許爲監司屬官。遷幹辦福建帥司公事。以格知臨安縣。政尙寬簡。吏民信化。刑罰衰息。會其友爲學官。豐勸拔滯淹士。坐此食宮觀祿。久之。始提轄左藏庫。復以宮觀罷。已而又授宮觀。而豐死矣。嘉定丁丑正月晦日也。年七十。豐旣挾奇才。人謂宜居館閣中祕。不應徘徊下列。日望其升。益顛仆不起。故聞其死多傷之。而龍泉葉適痛之尤深。豐性質易。無岸谷。然有以自負。命雲侶月。跨越汗漫。浩乎不可挽。暇日輒載一壺。獨行田野。不問歧路。抵暮而返。去家二里。有龍門峽。登眺徜徉。慨然曰。此可以止矣。仕雖不顯。無幾微見於顏面云。子二人。積耕。皆爲儒。贊曰。

武義之有鞏氏。自庭芝始。初庭芝登元城劉安世之門。以道學爲東平倡。弟子受業者恆數百人。及其來遷也。以所學化導如東平。故武義人士知尙義理之學。亦自庭芝始。至豐又從東萊呂祖謙游。於是中原

文獻麗澤淵源萃於一門矣。嗚呼懿哉。

葉秀發傳

葉秀發字茂叔。其先由括徙金華。爲金華人。秀發師事呂祖謙。唐仲友。極深性理之學。以餘力爲文。輒擢慶元丙辰進士第。弟子慕之。從其學者。歲至數百人。初授福州長溪簿。丁父憂而歸。服除。轉慶元府學教授。秀發嘗著論語講義。發越新意。以誨諸弟子。且曰。聖門授業之源。無過此書。然義理無窮。倘一切沿襲舊說。吾心終無所得。若欲見諸行事。是猶假他人之器以爲用。用之於己。且惴惴焉不以爲便。況欲假人乎哉。時鉅儒樓鑰。史彌鞏。婁昉。鄭性之。楊簡。袁燮。皆器秀發與之交。而於簡間難尤切。每至。日昃忘食。簡自謂有所啓發。得邊。詹。顧。葉。四子爲喜。葉蓋指秀發也。秩滿。關陞循從政郎。建寧府政和令。丁母憂。服闋。調安慶府桐城丞。金人犯蘄黃二州。桐城爲鄰壤。萬目睽睽。不相保。騎兵將迫。家人號泣求避。秀發叱之曰。此正臣子竭力致身之日。雖死何憾。苟先去之。如一邑生聚何。修城浚濠。日爲備禦計。會金人使諜者至。秀發擒之。亟斬於城門以徇。金人計沮。不得近。邑賴以完。事定。制闕。忌其功。不自己出。上其擅斬非法。降迪功郎。未幾。再敍。改令入官。授宣教郎。知徽州休寧縣。俄以前事論奪。秀發退居餘十年。無一毫缺望。意獨憤李誠之之冤。上書訟於朝。初。誠之守蘄。蘄陷。一城士卒皆戰死。無降者。誠之亦望闕再拜。拔劍自到。議者不錄其忠。反咎其不能全人。故秀發不平而訟之。言辭朗烈。聞者降嘆。史彌遠當國。人有自桐城來者。彌遠以秀發事爲問。其人歷言撫綏安定之詳。且謂某等得保首領至今。皆葉桐城之賜。不然。已無

桐城久矣。彌遠領之。從容問參知政事宣縉。其言同。彌遠嘆曰。幾失賢矣。即日起發。擢知真州揚子縣。轉奉議郎。差監都進奏院。越七日。僉知高郵軍。高郵爲淮東緊治。時尙釋騷弗寧。秀發上五策。一曰防海道。二曰審邊城。三曰擇武守。四曰練軍實。五曰畜財用。而以正人心。作士氣爲之本。言多聽。高沙三十六湖水高而田下。隄防不固。則千里一壑。民且無稼。秀發建石埭以疏水勢。滌洩有恆。無乾溢之病。其後馬光祖來爲守。行埭上。思秀發功。構堂樊梁之隄以祠焉。尋轉承議郎。疾作。上書乞致事。特陞朝奉郎。已而疾甚。力勅去貪墨吏。人勸其何自苦如此。秀發曰。不可。吾死後。彼必殘吾民。以逞同列。來問疾。整襟對坐。惓惓以究心邊事爲屬。無他言。其忠義出於天性。至死不變如此。紹定庚寅九月卒。年七十。卒之日。唯遺書籍數篋。弊衣一襲。至無以爲歛。當屬纊時。民夢秀發擁高牙大纛入嶽祠。民疑其爲神。遂肖像而祠其中。云。秀發夷險一節。臨事唯可以義動。不可以勢利劫。澤物之念。則若飢渴然。居田里日。有犯私鑄者。縣令趙善琛欲重其刑而連坐之。秀發曰。刑一成而不變。君子所盡心焉。縱姦固失。傷善亦豈爲得哉。善琛爲之止。有悍戾者日嗜鬪。富人嫉之。欲以嘯聚之名實於法。秀發白於郡守鄭如剛曰。血氣之爭。則有之。嘯聚則未之聞也。民因得不死。秀發卒後。累贈朝議大夫。學者尊之曰南坡先生。所著書有易說。周禮說。論語講義及詩文行於世。子夢擇。孫振祖。皆出仕。能以清白世其家。云。贊曰。

濂嘗讀國學進士王若訥記秀發桐城斬讎事。未嘗不流涕而嘆也。當金人陷斬士大夫析圭儻爵者。或納款買降之不暇。有若秀發者。官僅一丞耳。則不顧妻子。嬰城固守。法宜在所褒嘉。顧以擅斬而罪之。果

何道耶。譬有丈夫焉。居深山中。盜欲舞刀劍。劫其財。先遣游偵以察虛實。其隸怒殺偵者。丈夫乃不責盜而責隸可乎。不可也。國之政如此。將何以致乎治耶。宋自是面微矣。嗚呼。自古當季世。變白爲黑。倒上爲下。若斯之類甚衆。人所不能堪。而秀發安之。抑賢矣哉。

喻侃傳

喻侃。字伯經。義烏人。其從祖良能。與兄良倚。同入太學。又同登紹興丁丑進士第。其季良弼。亦太學生。晚以特科補新喻尉。皆以文學稱。而良能最知名。侃蚤從良弼學。繼受經於永康陳亮。復由太學諸生登慶元己未進士第。調宣城尉。有境外盜狙入尉界內。侃登執之。歸于府。府帥臣丘憲異之。乃立所由尉庭下。曰。盜逃出境。尉不執。闖入境。他尉乃執邪。所由尉震恐。開禧丙寅。金人犯淮府。檄令尉二人餉軍。由歷陽達鍾離。鍾離乃敵衝要。法當以重兵護糧。護不滿千人。令畏縮不敢前。侃奮不顧難。諭鄉長老召募足千數。卽行道經含山。有敗兵回揚。言於衆曰。我曹潰矣。將以糧資敵乎。弗去懼殲耳。民愕視亡策。將逃。侃曰。事急矣。乃命弓率執大斧而前。曰。設遇敵。尉必先死。職也。終不負國。汝未必死。乃負尉耶。欲去視吾斧。民不敢動。卒致饋於濠。糧有羨。衆謂尉宜得。侃悉歸于公府。遷慶元府觀察推官。丁父憂不赴。調隆興府觀察推官。真德秀來爲帥。素知侃能文。見侃與屬吏迎道左。爲之改容。思論薦之。未薦。德秀去。侃乃以選人爲宜春丞。宜春地接贛吉。吏珥筆成風。民善訟。侃爲人怛怛。諒直聽必以情。民退無後言。凡訴臺部者必曰。得宜春丞一聽。死無憾。居久之。由承直郎改奉議郎。僉書鎮南軍節度判官。聽公事。改章服。尋陞朝奉。

郎初偃久從諸老游。幕中多新進少年。議論雅不合。偃嘆曰。吾髮已種種。寧能與翩翩小兒較短長哉。遂請祠而歸。築室夫人峯下。曰蘆隱。若將終焉。嘉熙丁酉九月年八十四卒。子二人。宣子。武子。偃性豪。談論今古。輒目光如炬。氣軒軒出鼻。忽問人莫能抗。尤長於文辭。通直郎杜游嘗稱之曰。質而不俚。華而不靡。憤而不激。怨而不懟。不以食膾炙爲美。澹乎其有味。不以刺文繡爲工。黯乎其有光。其感時念故。推物類情。抑揚離合。必窮其源。以揚其波。其不合於律者鮮矣。君子以爲知言。當乾道淳熙閒。朱熹。呂祖謙。陸九淵。張栻。四君子皆談性命而闢功利。學者各守其師說。截然不可犯。陳亮偃起其傍。獨以爲不然。且謂性命之微。子貢不得而聞。吾夫子之所罕言。後生小子與之談之不置。殆多乎哉。禹無功何以成六府。乾無利無以具四德。如之何其可廢也。於是推尋孔孟之志。六經之旨。諸子百家分析聚散之故。然後知聖賢經理世故。舉三才並立而不廢者。皆皇帝王霸之大略。明白簡大。坦然而易行。人多疑其說而未信。偃獨出爲諸生。倡布挈綱紀。發爲詞章。扶持而左右之。使亮之門惡聲不入於耳。高名出諸老上。皆偃之功也。已而亮爲世議所扼。當路必欲擠之死地。凡再下詔獄。偃與同志生極力營解。幾陷羅織。遂脫亮於萬死一生之中。亮顧偃曰。此生死而肉骨也。人多義之。偃所著有隨見類錄二百卷。蘆隱類藁五十卷。首論六經之功用云。從弟南強。

南強字伯強。自幼負奇氣。父直方以與陳亮類。俾從之游。時著錄牒者歲數千百人。南強周旋其閒。獨能探深索隱。語移日。精銳鋒起。亮曰。喻伯強文墨翰議。凜然可畏也。慶元乙卯戊午連貢於鄉。未幾入太學。

中監舉。月書率占前列。上禮部皆不得第。嘉定庚辰。俛奉南廊。對授邊功部。臨安府當陽縣尉。轉修職郎。南強創射樓。補闕卒額。時其練習。春秋則都肄府中。徽職精明。行列整肅。龔出他縣上。縣民譚甲與丘乙。閔。譚女以癩死。誣丘驚跌所致。挾王丙爲左。縣以命南強。南強召譚與王列於庭。且詰譚曰。汝以病死女。誣人。汝不吐實。將坐汝。譚色動。顧謂王曰。汝嗾我也。亟袖案白上。言抵譚罪。境內多盜販。舳艫尾相銜。不絕。捕卒與豪猾爲市。弗可敗。南強一切禁捕。雖犯權勢。貽怨。譚弗懼也。寶慶初。禮部侍郎真德秀以言事去。廟堂風京尹。跡其所至。欲并以爲罪。德秀舟過富春江。南強亟見。且賦詩爲餞。人皆壯之。轉承直郎。處州縉雲丞。未上。紹定庚寅三月卒。年七十一。南強讀書。不爲口耳學。必欲見之實踐。每至名義可喜事。擊節慷慨。謂戾契可致。初嘗路欲排善類。指陳亮爲根。煨鍊刺骨。罪且不測。門人畏其威焰。噤不敢出聲。南強義形辭色。貽書誚責。言先生無辜受罪。將資恨入土。吾曹爲弟子。當怒髮衝冠。乃影響昧昧。是得爲士類邪。復走東甌。見葉適。備陳冤狀。適曰。子真義士也。卽秉燭爲作書數通。南強又持走越。袖見諸臺官。誦言無忌。卒直亮之冤。南強爲人不立崖岸。而見義勇爲。聞朝廷行一善政。輒昂首吐氣。或有司苛虐。彈指長吁。終日不樂。暇時。旅肴設醴。與賓友握手劇談。日至再三不倦。爲文善馳騁。下筆輒數千言。不繩削而自合。大篇短章。恣人取去。往往不甚愛惜。惟梅隱筆談十四卷尚存。子二。厚祖。莖莖業進士。贊曰。自道廢民散。師弟子之義缺。平居則繆爲恭敬。視其影或不敢踐。一逢患難。輒反目若不相識。然甚者至更名他師。使僭與南強見之。必將唾去之矣。傳曰。民生於三事之如一。唯其所在。則致死焉。其僭南強之

謂乎。

樓大年傳

樓大年，字元齡，義烏竹山里人。父伯寬，由太學入官，授江陰縣尉，轉知無爲軍襄安鎮以終。大年從鄉先生徐僑游，僑實朱熹弟子。故大年長於性命之學。登嘉定癸未進士第，調迪功郎池州青陽縣尉。丁內外艱，服除，監嘉興府袁部鹽場，尋知嘉興青龍鎮。該慶壽恩，循從事郎。嚴州遂安縣令，差兩浙西路提刑司幹辦公事。兩易監行在會子庫，同列以侵欺被劾，唯大年獨免。改宣教郎，知隆興府南昌縣，爲治先教化，建利去病。若嗜欲然。縣民夜行爲讎家毆死，事覺，賂其甥來就辟，甥自陳殺民狀甚悉。大年疑之，亟命丞往驗，丞受賂，使焚屍以滅迹。大年怒，聞於府屬錄事覆實。錄事復受賂如丞。大年正色抗辨，錄事爲引去。上之憲臺，令觀察推官重讞。事始白，民敬之，生爲立祠。遷奉議郎，通判吉州提點刑獄。李迪以大年廉慎，命錄一道滯囚。大年隨重輕而疏裁之，抱成案就迪言，咸聽。未幾攝郡事。江東大姓查氏，以父遺書據幼弟資產幾六十萬，弟長訴之縣州，歷二十年不解。迪曰：非清白吏如大年者，不足以究此。以其事下大年。舉張詠決子壻爭財故事爲例，命歸其弟。人以爲允。歲終，吏以公帑錢粟羨餘來白，曰：此公券內物，前官具有例。大年斥之以助軍餉。及周宗室之躄厄者，皆舉手加額而退。換承議郎，提領戶部犒賞所主管文字。尋陞朝奉郎。寶祐甲寅三月卒於官，年七十。子一人，三畏。大年襟度灑落，如晴空皎月，一塵不染。然在官洞察民隱，脫有理未安者，必反覆沈思，終夜不寐。所見一定，屹如砥柱不移。雖壓以權貴人之勢，弗回。

也。及解印綬去。攀轅臥轍者。綿亘十餘里。或者以爲無愧古循吏云。初理宗降。調康。謹刑二詔。大年撫古之可法戒者。二百事疏之。號銘心偶錄。藏於家。贊曰。

濂嘗過竹山。問大年子孫無恙。獲拜其遺像。瓌然一儒者爾。而其剛烈之氣。則常信於萬物之上。人果可以貌取之哉。自夫道學不明。士喪其所守。雖以魁梧奇偉之夫。考其行事。脂韋自媚。如女婦之留髻鬢也。其視大年何如哉。大年受學徐僑。與聞濂洛關閩之學。其所養充矣。此所以愈然獨異也。學之所繫於人者。有如是哉。

許子良傳

許子良。字宵說。東陽人。姿稟卓犖。幼誦書。一覽通大義。及壯。馳騁經史。精文辭。尤長於科目之學。抽關啓鑰。得言外意。生徒欣欣從之。旬月間。輒知爲文。肯綮嘉定丙子。以詩賦魁江東漕司。試禮部不利。嘉熙戊戌。始登進士第。年已五十餘矣。調餘姚簿。未上。用宰相喬行簡薦。監鎮江西酒庫。前此贏羨率自入。子良不納一札。以上歸公家。官吏相顧駭嘆。淮東轉運司辟主管帳司。瀕江有廬場三十里。所民資其利。守邊吏議清野。欲悉削去。子良諫之止。遷知晉陵縣。版籍紛亂。官賦多放失。諸司督逋。急如雷電。吏竄匿殆盡。前令以不良去。子良爲稽逃亡。考隱漏。催科定絲。條緒粲然。沿江制置司辟準備差遣。俄監安溪酒庫。改宣教郎知鄱昌縣。庫藏赤立。子良節縮浮冗。兩年之間。供輸遂有餘。豪右設詭名以欺租賦。莫敢何問。子良列其主名揭於市。復從而一之。豪右慚憤。陰圖中子良。無隙可乘而止。沿江制置司辟幹辦公事。轉承

議郎通判和州。改江州。差幹辦行在諸司糧料院。子良當輸對不欲立異。惟取廷臣所言有關天命人心之大者重陳之。不汎不激。上爲首肯再三。未幾有旨俾閱滯獄八十餘。子良爲縑案一一讞之。雖累歲不引決者。一旦曲直皆白。進太學博士。請外出知饒州。以臺疏罷。主管成都府玉局觀磨勘。轉朝奉郎。知岳州。復轉朝散郎。改知台州。弊蠹相仍。負上供錢三百餘萬。子良節縮如都昌。凡典例所宜得者亦謝去。居半載。郡計裕如。子良聽訟。據案與兩造相爾汝。以察其情。情旣得。卽決遣之。吏袖手旁睨。具文書而已。同僚與吏無所容其私。皆忌之。吏白每歲以錢折米二萬斛。子良又不許。而禁卒有不便者。於是嗾其毆獄吏以撼之。且相與出危言。子良知墮其計。卽委印出關去。事上降兩官。賈似道開闢荆湖。辟主管機宜文字。且爲辨其非辜。叙朝散郎。事有難處。他人不能寘筆者。經子良議定。人無異辭。景定庚申三月卒於沔川。年七十五。子良愴然如鶴。風措孤寡。性情介不同俗。與人交極尙風義。赴急扶顛。斧鉞在前弗暇顧。然剛腸嫉惡。或面折至發赤。世多樂軟媚。見其論議激烈。望風嚴憚。不知其襟懷夷坦。無纖芥含茹意。居官務抑豪強。凡武斷於鄉者悉刑之。事其長。懇懇欲納忠。縱嬰其怒不避。知都昌日。方岳來爲郡。岳面目嚴冷。人不敢仰視。子良數爲抗辨。且曰。侯自我得之。自我失之。雖獲罪無恨。岳初怒甚。已而察子良忠亮。反剗薦之。子良生平奉養甚儉。雖列廡仕。蕭然如寒士。客至啜茗清談。飢則煮餅而已。子良子四人。伯繼仲立。最良贊曰。

黃夢炎有云。子良之爲人。其平如砥。其直如弦。其堅剛如百鍊金。其孤峭如危壁千仞。江萬里亦云。蒼苦

勁嶷不知四方復有何人。文學政事。當推子良爲第一。吳子良亦云。鏡明而衡平。子良以之。無愧於清白吏王萬者也。子良何以得此於人哉。非真卓然有立。合於詩之柔不茹。剛不吐者。未必能致於斯也。嗚呼。賢哉。或者以子良從似道辟。爲白壁蒼蠅之玷。知人之道。帝堯亦難之。而顧以此尤子良邪。其求全也甚矣。

葉由庚傳

葉由庚。字成父。義烏人。伯祖維芑。祖維休。連擢進士第。父藁。字實之。以世科累遷太常寺主簿。輪對。言中書政本宜清。心正。己以求賢爲務。時宰不樂。改軍器監丞。差知荆門軍。建堡柵。開溝洫。蒐練民兵。人思奮厲。會京西帥幕。建議築城東蒙兩山之顛。藁以山無水泉。且非敵路。條其不便者六。制置使趙方主先入之說。不從。藁嘆曰。敵民誤國。寧有避耳。遂解印綬去。有旨除夔州路轉運判官。俄復予祠。尋差知武岡軍。未上而卒。由庚生而口吃。嗜讀書。從周大亨習春秋爲舉子業。試有司不中。遂絕意進取。時丹溪徐僑倡明考亭朱熹之學。四方人士多集其門。由庚執經從之。僑授以中誠仁命性心六字之說。由庚早夜磨礪。探窮經旨。驗之於躬行。期凝合而無間。僑謂人曰。成父從僑最久。靜慮無他。好講學。意趣殊深。吾道爲有所託矣。遂以通名其齋居。且戒之曰。心體之流行。卽天運之流行也。無乎不通。而塞之人其物矣。由庚佩之終身。金華何基。王柏。皆宗於熹學。次第相傳。遠有端緒。皆慕由庚造詣真切。相與貽書辨析。至無虛月。基疑周子太極圖補先天圖之未備。其辭多云云。由庚則曰。太極圖與先天圖實相表裏。固不待預見先

天圖而暗與之合。先天有圖。其辭已具於大傳說卦中。亦不待邵子別爲論議而後明。況先天乃伏羲所圖。無非法象自然之妙。太極乃周子自出心思。擬形畫象而爲之者。先天圖當作先天圖觀之。太極圖當作太極圖觀之。圖雖不同。而其理則未嘗不一也。若曰周子之爲圖。盡在於修之一言。使學者可以用功。謂之隨時立教。至是益備則可耳。切不可謂陰有以補先天圖之未備也。先天圖自太極生兩儀。加倍而爲四八。以至於六十四。左自一陽而六陽。右自一陰而六陰。自然生生不窮。皆是天地本然之妙。太極圖止於四象。以爲火水木金。卽其中以爲土。說至五行輒止。各有其義。未易優劣。正不必將先天圖比並參較也。柏以論語屬詞聯事。集爲魯經章句。而以大學中庸孟子爲之傳。已整比成卷。質之由庚。由庚則又曰。記錄之書。非經體也。移易固未爲不可。第論語乃孔子之微言。與他記錄者實殊。非可以緒分類合也。南軒張子以程子之意。類聚孔孟言仁。朱子猶恐長學者欲速好徑之心。滋入耳出口之弊。又況孔子之言誠。有不可破壞者。以今第一卷首條子溫而厲。威而不猛。恭而安類。爲夫子出處。若入門人記孔子德容之盛。未爲不可。第二卷首條堯曰。至公則說。乃弟子於終篇特記聖學之傳。以著明二十篇之大旨。與孟子篇終歷敘道統同一意。亦恐不但思古傷今而已也。今欲尊四書爲魯經。唯以孔子格言大訓與問答之語爲經。門人自言及子思孟子之書爲傳。則庶幾爾。夫欲尊之曰經者。以其大公至正。爲萬世常行之道。不可下同諸子並稱。不必類合而經始尊也。基柏皆深服其言。由庚於講切義理。不立異。不苟同。虛己精索。必求真。是之歸。雖十往返不厭。然其爲人端重。寡言笑。燕居謹獨。盛服不去身。暑月則冠雲巾。

衣素紗。深衣終日澄坐。四時之祭。豫戒內外祇事。具饌必豐潔。冥幣必置名封識。如期行事。命弟子爲僮。贊奠獻告。廟成徹俎而退。則以餽餘饗宗人。若冠若昏喪。亦皆遵熹家禮。問道考德者。戶外之屢常滿。其誨學者曰。古之人知行並進。聞一善言。見一善行。未之能行。唯恐有聞。若纏蔽於文字閒。待其知至而後行。是終無可行之日也。人以爲名言。縣大夫過門問政。多以謹義利之辨。及視民如傷告之。邑民陰被其賜。部使者蔡抗。及郡守趙汝騰。趙孟傳。先後具書幣。請由庚攝麗澤書院山長。雖皆力辭。而名聞益顯。婦人女子。亦知其爲修身踐行之士也。前至元己卯閏五月年七十八卒。無子。以族子遐孫爲後。平生不務著書。雖研濂洛諸家之說。以教人。僅有論語纂遺若干卷。詩文若干卷。瘦叟自誌一卷。藏於家。贊曰。婺傳朱熹之學。而得其真者。何基則受經熹之高第弟子黃翰。而王柏則基之門人也。至若徐僑親承指授於熹。而由庚從僑游者最久。又盡得其說焉。及僑旣沒。由庚與基柏。遂以道學爲東南倡。評者謂基深潛冲澹。得學之醇。柏通睿絕識。得學之明。由庚精詳暢達。得學之通。考其一時化迪之盛。入其室者。殆如春風和氣之襲人。從容一言之加。輒睥面盎背。而鄙吝爲之消盡。嗚呼。何其盛哉。九京可作。濂當爲執鞭焉。

吳思齊傳

吳思齊字子善。處之麗水人。祖深。有奇才。永康陳亮以子妻之。遂來家永康。父遂。武學博士。官至朝散郎。知廣德軍。思齊少穎悟。仿遂爲古文。即可誦。季父國子監丞天澤器之。悉授以所學。遂用辭章家知名。尋

由任子入官。監臨安府新城稅。鎖廳試漕司中舉。上禮部不利。後從常調爲嘉興縣丞。會令以言去。攝縣事。縣獄多留繫。思齊坐獄戶讞問。凡株連疑罪。悉簡出之。死刑多平反。事有檢覆得實。郡首吏持之。上下承望不敢動。亟聞部使者。黔之郡有盜殺其黨於貨。獄蔓延不決。下思齊議。思齊曰。盜攘盜貨。與民殊科。獄久不斷者。由吏教囚以贓累民爾。若正其殺人罪。置寄贓不問。則得矣。慮囚者如其言。民有育人之子者。恆出於父母家。一旦忽不知所往。其父訟求之。思齊召父母至庭。一訊而情無隱。卒白其事。提點刑獄洪起畏辟思齊。類曰。吏或謂通籍可立致。思齊曰。斂怨以干祿。非策之上也。辭。尋監戶部犒賞酒庫。起畏時守鏡江。復檄入幕府。起畏議築城。思齊諫曰。京口以長江爲天塹。城之何爲。卽城徒厲民耳。其役遂輟。賈似道喪母。上將以太常鹵簿臨其喪。禮部侍郎文及翁欲上疏言懼禍且中止。思齊曰。叱嗟而母婢也。公不可默也。未幾。遷饒州節制司。準備差遣。監察御史俞浙以論謝堂出爲太府少卿。留夢炎當國。言堂有勳籍。浙劾之過。思齊曰。公宅百揆。畏勢家而屈臺論。天下其謂何。似道丞相。堂貴戚。力能生殺人。思齊以小官中其諱惡。不虞宣泄。人爲危之。而思齊弗顧也。俄不願仕。請監南嶽廟。流寓桐廬。婦翁方登嘗知饒州。以思齊賢。每謀以自近。思齊不樂。依婦勢避去。性好施與。兄弟孤女無歸者。嫁之。比鄰免女欲殺者。全之。死無以斂手足者。棺之。宦游十年。田無半晦之增。後值宋改物。家益艱虞。至無僮石之儲。有勸之仕者。輒謝曰。譬猶處子業已嫁矣。雖凍餓者不能更二夫也。中遇寒疾。耳失聽。交游苦其聾。語未畢。馳去。獨娶方鳳。粵謝翹睦。方壽。劇談每至夜。指畫手書。嘗飄咄咄而略無倦意。先墓在麗水。不能數歸省。歲時必

遙望隕涕。因自號全歸。誓不失身以病父母也。思齊天性直懇。雖行人所難。坦然不見崖異。心知有是非。不知有毀譽禍福。學者尊其行。爭師之。方鳳評思齊之爲人。如徐積陳師道。君子不以爲過。大德辛丑年六十四。手編聖賢順正考終之事。曰。俟命錄。錄成。賦詩別諸友。遂卒。臨卒神明湛然。無怛化意。所著書有左氏傳闕疑。擬周公瑾平荊州碑。魏司馬孚贊。跋杜詩集。陳亮葉適二家文選。又做真德秀文章正宗。輯宋一代詩文。卷藁多未就。子三人。翼之。拱之。成之。拱之蚤卒。贊曰。

濂遊浦陽仙華山。問思齊奮游處。見其石壁題名。尙隱隱可辨。故老云。思齊與方鳳謝翱。無月不游。游輒連日夜。或酒酣氣鬱時。每扶攜望天末。慟哭。至失聲而後返。夫以氣節不羣之士。相遇於殘山剩水間。奈之何而弗悲。若思齊者。其知事君不以存亡。貳其心者歟。工有哀思齊者云。睨碣石。其如卷兮。鉅海簸而不移。其言信矣哉。

謝翱傳附

謝翱。字臯羽。福之長溪人。後徙建之浦城。父鑰。性至孝。居母喪。哀毀廬墓。終身不仕。通春秋。著春秋衍義。左氏辨證。傳於時。翱世其學。試進士。不中。落魄漳泉二州。僮有大節。會丞相文天祥開府延平。長揖軍門。署諮事參軍。聲達梁楚間。已復別去。及宋亡。天祥被執以死。翱悲不能禁。隻影行浙水東。逢山川池榭。雲嵐草木。與所別處。及其時號相類。則徘徊顧盼。失聲哭。嚴有子陵臺。孤絕千丈。時天涼風急。翱挾酒以登。設天祥主荒亭隅。再拜跪伏。酌畢。號而慟者三。復再拜起。悲思不可遏。乃以竹如意擊石。作楚歌。招之。

曰。魂朝往兮何極。莫來歸兮關水黑。化爲朱鳥兮有味焉食。歌闋竹石俱碎。聞者爲傷之。然其志汗漫超越。浩不可禦。視世閒事無足當其意者。獨嗜佳山水。鴈山鼎湖。蛟門候濤。沃州天姥。野霞碧雞。四明金華。洞天搜奇挾祕。所至卽造游錄。持以誇人。若載七寶歸者。游倦輒憩浦陽江源。及睦之白雲邨。尋隱者方鳳。吳思齊。晝夜吟詩不休。其詩直遡盛唐而上。不作近代語。卓卓有風人之餘。文尤蘄拔峭勁。雷電恍惚。出入風雨中。當其執筆時。瞋目遐思。身與天地俱忘。每語人曰。用志不分。鬼神將通之。其苦索多類此。婺睦人士翕然從其學。前至元甲午。去家武林西湖上。前代遺老尙多存者。咸自詫見翺晚。明年乙未。以肺疾作而死。年四十七。瀕死屬其妻劉氏曰。吾去鄉千里交游。惟方韶卿。吳子善。最親。不翅兄弟。慎收吾文。及吾骨授之。韶卿卽鳳子善卽思齊已而鳳等果至。與方幼學。方薰馮桂芳。翁登登之弟衡。壘翺子陵臺南。以文稿殉。伐石表之曰。粵謝翺墓。初翺以朋友道喪盡。吳越無掛劍者。思合同志氏名。作許劍錄。勒諸石。未就。復爲建許劍亭於墓右。從翺志也。翺無子。其徒吳貴祠之月泉書院云。翺好修幽獨。刻厲憤激。直欲起古人從之游。不務諧於流俗。意所不願。萬夫莫回也。每慕屈平。託興遠游。自號晞髮子。每談勝國事。輒悲鳴。頰促涕泗。潸然下。士有苟合而氣志得者。憎聞翺。翺自若也。所著手鈔詩八卷。雜文二十卷。唐補傳一卷。南史補帝紀贊一卷。楚詞芳草圖譜一卷。宋饒歌鼓吹曲各一卷。睦州山水人物古跡記一卷。浦陽先民傳一卷。天地閒集五卷。東坡夜雨句圖一卷。浙東西游錄九卷。餘倣秦楚之際。月表作獨行傳。及左氏傳續辨。歷代詩譜皆未完。所選唐韋柳諸家詩。及東都五體詩。不在集中。贊曰。

翽一布衣爾。未嘗有爵位於朝。徒以被天祥之知。麻衣繩屨。章皇山澤閒。若無所容其身。使其都重錄受社稷民人之寄。其能死守封疆決矣。翽不負天祥。肯負國哉。翽蓋天下之士也。昔田橫不降漢。拔劍自刎。客之從死者五百人。若翽之志。其有類橫之客者非邪。吾聞諸任先生云。

楊氏家傳

楊端。其先太原人。仕越之會稽。遂爲其郡望族。後寓家京兆。唐末南詔叛陷播州。久弗能平。僖宗乾符三年。下詔募驍勇士將兵討之。端夢神人告曰。爾亟往。此功名機也。端與舅氏謝將軍詣長安。上疏請行。上慰而遣之。行次蜀。蠻獠知之。斂退者半。乃詣瀘州合江。逕入白錦軍高遙山。據險立砦。結土豪與蔣黃三氏爲久駐計。蠻出寇。端出奇兵擊之。大敗。尋納款結盟而退。唐祚移於後梁。端感憤發疾而卒。子孫遂家於播。宋贈太師。太師生牧南。旣嗣世。痛父業未成。九溪十洞猶未服。日夜憂憤。其子部射逆其志。選練將卒伐羅閩。時閩附南詔。部射深入。閩匿將士絕其後。部射力戰死。其子三公抱父尸不去。閩執之以歸。牧南卒。三公幽於閩半載。會阿永蠻酋長黑定與閩有連。語之曰。殺其父而囚其子。人弗爲也。盍歸諸閩。不答。黑定怒。夜以一牝馬竊載與俱歸。且發兵納三公界上。三公遣衛兵檄召謝巡檢。謝帥蠻獠逆之。會濟江蠻獠忽懷異志。引舟岸北呼謝曰。爲我語若主。當免我科賦。否則吾不以舟濟。三公怒。瞑目視舟。噓者三。舟奔而前。三公遂涉。蠻獠爭持牛醢酒爲謝。三公剽帛繫獠頸。吸水喫之。帛或蛇形。獠伏地哀祈。誓輸賦不敢反。三公復喫之。帛如初。三公生二子。寶實。寶當立。自以才不逮。讓與實。實字真卿。聞宋太祖受命。

卽欲遣使者入貢。會小火楊反。新添族二部作亂。實同謝巡檢討之。夜薄賊營。盡殲其衆。實傷流矢。病創而卒。實生昭。字子明。旣嗣世。二弟先。蟻各擁強兵。先據白錦東。遵義軍號下州。蟻據白錦南。近邑號揚州。昭不能制。曾未幾何。蟻稱南衙將軍。舉兵攻先。且外結閩兵爲助。謝巡檢子都統。謂昭之子貴。遷曰。蟻召仇讎而賊同氣。罪不容於死。盍討之。遂大發兵。設三覆於高遙山。要其歸而擊之。閩大潰。赴水死者數千。蟻亡入閩。貴遷。太原人。與端爲同族。其父充廣。乃宋贈太師中書令業之曾孫。莫州刺史充本州防禦使。延朗之子。嘗持節廣西。與昭通譜。昭無子。充廣輟貴遷爲之後。自是守播者皆業之子孫也。貴遷字升叔。慶歷皇祐閒。儂智高亂邕。貴遷曰。通夜郎。浮牂牁。出其不意擊之。漢制南粵之奇策也。吾當報國以自效。卽如瀘次於南川。得暴疾。將還。其季父先使南川鉅族趙隆要殺之。官至武功大夫德州刺史。生三子。光震。光榮。光明。光震字長卿。瀘南蠻羅乞弟叛。瀘遣使乞師。光震督兵行。時閩黨宋大郎與乞弟通。遏其歸道。光震與戰連七日不決。遣帳卒王龍問道走播。趣謝都統濟師。謝至武婆山。見二酋縱騎橫槊馳騁。若指麾其衆。謝以勁弩射其一。應弦而斃。其一大憤拔刃衝陣。謝斫傷其首殺之。卽宋兄弟也。二人懼而退。因不能爲瀘患。光震官至從義郎。沿邊都巡檢使。生五子。文廣。文真。文錫。文貴。文宣。文廣字敬德。少孤。仲父光榮潛謀篡立。衆弗與。光榮奔高州。欲藉蠻兵以危宗國。文廣與部將謝石近謝成忠謀。奉書幣送光榮以歸。事之如初。光榮復欲陰鳩文廣。文廣詭爲不知。愛敬日篤。黃標儀盜發。光震墓。文廣捕斬之。事連其弟理郭。理郭奔高州蠻。謀作亂。會老鷹狝獠穆族亦叛。文廣命謝都統討平之。斬理郭。戮穆獠。釋其黨。

七人。初西平搖視諸蠻尤桀黠難制。文廣偕成忠夜入其柵擒獲之。尋數其罪貸焉。當文廣之時。蠻獠爲邊患。楊氏先世所不能糜結者。至是叛討服懷。無復攜貳。封疆闢而戶口增矣。年僅三十六而歿。君子惜之。官至武節大夫。生三子。惟聰。惟吉。惟信。惟聰字晦之。七歲而孤。育於母舅謝石近家。石近以主少衆貳。因奉光榮攝堡事。光榮立日久益固位。惟聰旣長。光榮深忌之。真毒魚中欲加害。覺之弗食。光榮復爲送婦高州。紿與俱。將殺於中途。謀洩。弗果行。光榮恚。籍播州二縣地千七百里。往獻於朝。詔卽其地建白錦堡。加光榮禮賓使。光榮還。惟聰率部佐出迎。光榮豫置毒於茗。以俟。隸人誤進。光榮啜之卽斃。惟聰始親政。光榮弟光明懟惟聰。暮夜以兵劫之。惟聰出禦。光明敗奔蜀。訴於部使者李獻。誣惟聰謀不軌。獻入其辭。矯發南平諸寨兵入播。惟聰憤懣不自勝。大集兵拒戰。敗其師。事聞。詔奪獻官。進惟聰修武郎。左班殿直。賜金帶錦袍慰諭之。光明因亡入閩而死。居無何。惟吉復作亂。殺惟聰二子。衆怒共誅之。惟聰深懲家難。禱於上下神祇。誓曰。世世子孫不可以權假人。違此言者。天實殛之。惟聰復生二子。選。選字簡夫。始立。值徽欽二帝播遷。高宗南渡。選慷慨負翼戴志。務農練兵。以待徵調。士大夫趨之。性嗜讀書。擇名師授子經。聞四方士有賢者。輒厚幣羅致之。歲以十百計。益士房禹卿來市馬。爲苗人所劫。轉鬻者至再。選購出之。遷於客館。給食與衣者數載。屬歲大比。選厚餽。遣徒衛送其還。益竟登進士第。遂貳於選。謀入閩。作亂。選邑邑喪明而終。官至武經郎。生十有三子。唯軫軾最良。軫字德輿。美髯長身。壯貌瓌偉。剛果勇決。人服其能。嘗病奮堡隘陋。樂堡北二十里。穆家川山水之佳。徙治之。是爲湘江。軫初無嗣。鞠軾子寮爲後。晚

生三子。勳居鼎。以粲賢。遂不易初議。尤愛軾。尋授軾堡政。獨築室萬泉以終。軾畜一虎馴服。左右常駕以出。游人異之。官至秉義郎。軾字德載。沈靜寬厚。孝友無間言。遇軾諸子。不翅若己出。初先據下州。世治兵相攻。凡七傳。至煥。軾之幕官。猶泳從容。白曰。骨肉相殘。蠻獠之俗也。上下楊其初由一人而分。干戈日夜相尋。孰若講信修睦。復兄弟之親乎。軾欣然曰。吾有志久矣。子爲我往說之。泳至下州。煥頓顙受命。遂盟而還。軾留意藝文。蜀士來依者愈衆。結廬割田使安食之。由是蠻荒子弟多讀書攻文。土俗爲之大變。軾官至成忠郎。累贈武節郎。粲字文卿。小字伯強。幼授大學。卽掩卷嘆曰。此非一部行程歷乎。必涉歷之。至乃可爾。長好鼓琴。投壺。粲母弟輝有寵於父。幾奪其位。粲亦欲以位讓之。因猶泳言得不廢。開禧二年。蜀帥吳曦叛。粲帥師赴援。會曦誅不果。貢戰馬三百。黃白金鉅萬。且請因曦誅大舉北伐。以雪先恥。上優詔答焉。嘉定十二年。復輸馬三百於蜀帥。蜀帥以聞。上益嘉之。南平苗穆永忠盜據公家田。粲曰。穆不道犯王略。吾爲藩臣。可緩其死耶。帥衆討平之。斬永忠歸其田。南平閩曾偉桂弑父自立。粲聲罪致討。敗其衆於滇池。斬首數千級。闢地七百里。獲羊牛鎧仗。各以千計。煥連盟鈔掠界上。粲遣兵誅之。歸煥所掠地賦於珍州。下楊平。邊患遂熄。粲性孝友安儉。素治政寬簡。民便之。復大修先廟。建學養士。作家訓十條。曰。盡臣節。隆孝道。守箕裘。保疆土。從儉約。辨賢佞。務平恕。公好惡。去奢華。謹刑罰。論者多之。楊氏居播。十三傳。至粲。始大官。終武翼大夫。累贈右武大夫。吉州刺史。左衛大將軍。忠州防禦使。賜廟忠烈。封威毅侯。生三子。价。佐。佑。价字善父。英偉沈毅。自少不羣。父沒。以郡政畀其子文。專志養母。端平中。北兵犯蜀。圍青野原。

价曰。此主憂臣辱時也。其可後乎。乃移檄蜀闕。請自效。制置使趙彥訥以聞。詔許之。馳馬渡劍。帥家世自
瞻之兵五千戍蜀口。圍解。价功居多。詔授雄威軍都統制。未幾。復白錦堡爲播州。文領郡。价統兵如故。蜀
警又急。詔价以雄威軍戍夔峽。价分署所部屯瀘渝。遣奇兵擊東。遂以捷多。遷武功大夫。關門宣贊舍
人。嘉熙初。制置使彭大雅鎮渝。檄价赴援。价督萬兵屯江南。通蜀聲勢。北兵不敢犯。孟珙宣撫荆湘。余玠
制置西蜀。皆倚价爲重。上屢下詔褒美之。价指天誓曰。所不盡忠節以報上者。有如皦日。一日。大飯羣僧。
价跌坐蒲。佛書數語而終。价好學。善屬文。先是。設科取士。未及播。价請於朝。而歲貢士三人。云。贈開府儀
同三司。威武軍武忠正軍節度使。賜廟忠顯。封威靈英烈侯。文字全斌。紹定中。北兵始入劍。文日閱士卒
爲備。蜀中避地者多歸之。嘉熙中。北兵窺江。彭大雅復來徵師。价命裨將趙暹帥萬兵赴戰石洞峽。擊破
之。以功轉武德郎。關門祗候。父卒。詔起文視事。進武功大夫。關門宣贊舍人。文移書余玠曰。比年北師如
蹈無人之境者。由不能禦敵於門戶故也。曷移鎮利閬。經理三關。爲久駐謀。此上計也。今縱未能大舉。
擇諸路要險。建城濠。以爲根柢。此中計也。下則保江自守。縱敵去來耳。況西番部落。已爲北所誘。勢必撓
雪外。以圖雲南。由雲南以并香蠻部。闕邕廣。窺沅靖。則後門幹腹深可憂也。玠偉其論。竟徇中計。後果如
文言。淳祐八年。西帥俞興西征。發兵五千人與俱。大戰者三。皆捷。遷左衛大將軍。余玠北伐漢中。文命將
趙寅會兵渝上。三次戰。又捷。十二年。北兵圍漢嘉。文使總管田萬率兵五千間道赴之。夜濟嘉江。屯萬山。
必勝二堡。萬以勁弩射之。敵不能支。遂卻。加右武大夫。寶祐二年。北兵由烏蒙渡馬湖。入宣化。宣撫使李

曾伯來徵師。文遣弟大聲統兵行。大小九戰。又捷。轉左武大夫。五年。北兵循雲南將入播。文馳奏。詔節度使呂文德偕文入闕。論羣酋內屬。大會勃先領衆降。六年。拜親衛大夫。以解漁城圍。翦烏江寇功。加忠州團練使。景定間。劉雄飛夏貴守蜀。復江安州。餉禮儀山。戰懸壺平。而播兵爲多。進中亮大夫。和州防禦使。播州沿邊安撫使。爵播川伯。食邑七百戶。詔雄威軍加御前二字。以寵異之。歲賜鹽帛給邊用。著爲令。文留心文治。建孔子廟。以勵國民。民從其化。卒於咸淳元年。贈金州觀察使。元贈榮祿大夫。同知樞密院事。柱國。追封播國公。諡崇德。生一子。邦憲。字仲武。儻有大節。好書史。善騎射。始冠。授成忠郎。雄威軍副都統。通管州事。二年。閩大舉入寇。破立邊諸戍。邦憲出師拒之。閩敗卻。尋潛渡烏江。步騎猝至。民大駭。邦憲部署諸將。令曰。必勦此寇。而後朝食。蠻聞。急引退。甫涉江。邦憲追擊。大敗閩衆於中流。斬首千級。擒其酋羅汝歸。進武節大夫。沿邊安撫使。閩又悉兵寇下邑。邦憲復敗之。獲酋長阿鮮。歷舉其罪狀。而釋之。閩自是懼。不復出。拜利州觀察使。遷左金吾衛上將軍。安遠軍承宣使。牙牌節度使。至元十二年。宋亡。元世祖遣使者詔邦憲內附。邦憲捧詔三日哭。奉表以播州珍州南平軍三州之地降。十五年。入朝。詔襲守如故。拜龍虎衛上將軍。侍衛親軍都指揮使。紹慶珍州南平等處沿邊宣撫使。播州管內安撫使。播下邑黃平。壤近於荆地。荆之戍將欲奪而南。邦憲發其姦。請復歸黃平。十八年。陞宣慰使。十九年。閩叛。詔發諸道兵進討。師道播而入。邦憲給饋餉。命將卒與之俱。乃平之。累贈推忠効順功臣。銀青光祿大夫。平章政事。柱國。追封播國公。諡惠敏。生一子。漢英。字熙載。五齡而孤。二十三年。其母貞順夫人田氏。挈之朝京師。世祖

摩其頂。熟視良久。諭宰臣曰。是兒真國器也。宜以父爵錫之。賜名賽。因不花。授金虎符。龍虎衛上將軍。紹慶珍州南平等處沿邊宣慰使。播州軍民安撫使。賜金繒弓矢鞍勒遣歸。二十四年。族黨構亂。殺貞順夫人。漢英衰經人奏。上詔捕賊。至益州。戮以徇。二十七年。詔郡縣上計。播之鄰鏡拒命。漢英卽括戶口租稅籍進。世祖大悅。加播州等處管軍萬戶。二十八年。漢英入朝。奏罷順元宣慰司。升播州安撫司爲宣撫司。授漢英軍民宣撫使。會羅甸宣慰使幹羅思誘播下邑黃平諸寨酋。詐爲新闢境土以獻。漢英奏復之。幹羅思恚不勝。誣言舊有雄威忠勝二軍。思播匿弗奏。請籍征交州。漢英抗言納土時已隸別籍矣。御史臺審覈上之。詔寢其事。俄拜漢英侍衛親軍都指揮使。成宗卽位。漢英入朝者三。大德三年。詔錫漢英世守其土。漢英奏改南詔驛道。分定雲以東地隸播。西隸新部。減郡縣冗員。去屯丁糧三之一。民大便之。二年。部蠻桑柘亂。湖廣行省議用兵。漢英言賊勢方盛。宜招諭之。不聽。兵出久無功。竟以漢英議始相繼降。五年。右丞劉深討南詔。道出播。漢英輦運軍食無乏。六年。閩婦蛇節宋隆濟叛。詔合湖廣四川二省兵征之。命漢英以民兵從。甫出師。卒遇賊。漢英力戰。大軍繼之。降阿直拔乍籠。賊復合拒。竟大敗。縛蛇節。斬隆濟。阿女而平之。以功進資德大夫。賜玉帶金鞍弧矢。仁宗立。願禮益厚。進勳上護軍。增賜金帛。延祐四年。黃平南蠻蘆葦叛。新部黎魯亦嘯劫聚亂。詔漢英宣撫之。二賊降。置戍而還。漢英爲政急教化。大治泮宮。南北士來歸者衆。皆量才用之。喜讀濂洛書。爲詩文尙體要。著明哲要覽九十卷。桃溪內外集六十四卷。賜推誠秉義功臣。銀青榮祿大夫。平章政事。上柱國。追封播國公。諡忠宣。其妻田氏亦善讀書。人以爲難能。

無子。以弟播州招討安撫使如祖之子嘉貞嗣。嘉貞至治二年來朝。英宗賜名延禮。不花累官資德大夫。湖廣行省左丞。沿邊宣慰使。嘉貞卒。子資德大夫播州軍民宣撫使忠彥嗣。忠彥卒。子資德大夫紹慶珍。州南平等處沿邊宣慰使。播州軍民安撫使。侍衛親軍都指揮使元鼎嗣。元鼎卒。無子。田氏以如祖季子嘉議大夫湖廣行省參知政事。播州沿邊溪洞招討使城之子鏗嗣。入我國朝。鏗遣使內附。授以播州宣慰使。實洪武初年云。

史官曰。播州本秦夜郎。且蘭西南隅故地。苗獠錯居。時出爲中國患。楊端藉唐之威靈。帥師深入。遂據其土。五傳至昭。旂子中絕。而貴遷以同姓來爲之後。又三傳至文廣。威讐德懷。而羣蠻稽首聽命。益有光於前人。又三傳至選。留意禮文。尊賢下士。荒服子弟。皆知向學。民風爲之一變。又二傳至粲。封疆始大。建學造士。立家訓十條。以遺子孫。其子孫亦繩繩善繼。尊尙伊洛之學。言行相顧。一如鄒魯之俗。昔之爭鬪。攸擬之禍。亦幾乎熄矣。何其盛歟。嗚呼。楊氏以一姓相傳。據有土地人民。侈然如古之邦君。由唐歷五季。更宋涉元。幾六百年。穹官峻爵。珪組照映。亦豈偶然之故哉。蓋蒙詩書之澤。涵濡惟深。頗知忠盡報君之道。或天有以相之歟。楊文公大年所行貴遷之先人詬辭。其中書令業。則曰向事僞主。當朕親征。爰屬危機。能傾丹款。其莫州刺史延朗。則曰奮身軒陛。効命疆陲。均甘苦而得士心。衽金革而從王事。以此觀之。其功在國家。澤被生民。可謂厚矣。奕世光榮。而弗絕者。雖本於天。其亦有以也哉。其亦有以也哉。

劉彬卿傳

劉彬卿名文質。彬卿其字也。姓劉氏。其遠祖仁贍。仕南唐。以忠節著。子孫居袁者。遷於豫章。今爲豫章人。彬卿讀書不泥章句。務在躬行。年踰三十。擔簦走燕都。燕都貴人。一見爭相引重。薦爲太師國王府儒學正。陞教授。皆不赴。除承懿寺照磨。曾未幾何。改繕工司照磨。貢新麵上京。彬卿旦夕視惟謹。諸司同行者。以入雨紅腐。絀於吏議。惟彬卿獨否。帝與后妃太子皆賜之衣。衣凡五襲。人爲彬卿榮。彬卿曰。吾敬君之道當爾也。轉詹事院管勾。府正司典簿。壽福都總管。府經歷。中書左丞史克新。戍遼陽。時江南餉道絕。各屯田以食軍士。食且不給。廷議欲徵其米五萬石。人難之不敢往。彬卿毅然請行。初至軍。有欲害之者。彬卿色不變。豐壘爲陳利害。衆咸感動。卒致三千四百斛以歸。李羅帖木兒以中書平章統兵鎮西京。人畏其威。不敢仰視。彬卿持官書至。左右索視之。弗與。遂辭不爲通。彬卿呼曰。朝廷之命。將委之草莽耶。李羅聞之。竟出見彬卿。以官書進。李羅視已。謂彬卿曰。可與幕府議之。彬卿曰。官書旣達。行與否在平章。使臣何與焉。趨而退。李羅不敢強。將宴畱之。彬卿曰。使事已畢。尙何畱。卽日上馬去。從事官皆餞之出郊。嘆曰。此真使者。世蓋不多見也。府公俱徵僧昧。僧愬御史臺。臺臣問曰。何獨無劉經歷邪。僧曰。經歷乃儒者。理苟直。不俟人言。不然。徒言之無益也。且於我無所私焉。敢誣之。特授大司農司照磨。宣政院聞之。欲辟爲屬。弗能奪而止。時官牛多掠於亂兵。貧窶人無所訴。富有者反指以實口沒。去牛羊失其租。彬卿舍乘傳。僞衣醫者服。徒行民間。廉其實以聞。徵富人租。而優貧窶之家。京南諸倉亡慮數十。不以時入糧。民告病。彬卿馳驛察之。旣至。給驛吏曰。吾將使江南爾。因託故遲畱。徧詢倉之前後民。盡得其情。乃往揖倉使。

崔甲曰。吾使臣爾。願預坐隅。以觀美政可乎。崔不答。彬卿遂坐。與談倉中事。崔忽拂衣起曰。君知有使者事爾。乃暇及此耶。彬卿罵曰。吾農官也。吾不叩汝等。誰復叩之。汝卽具文書來上。倉中人皆吐舌相顧。卒治崔如法。遠近不待督而事集。已而陞本司都事。擢樞密院都事。俄復入都。水監爲丞。陞少監。階中順大夫。彬卿性耿介不阿。行事絕與流俗異。初至燕。客塔海平章家。平章勸其納少室。以奉巾櫛。彬卿曰。家有糟糠之妻。相期至髮白。肯中道棄之乎。不聽。其子時敏方幼。一少年誘其馳馬。竟跌死。或語彬卿宜訟。彬卿曰。吾兒死生有定命。可尤人耶。經一晝夜。忽自蘇。後十二年。補大宗正府譯曹掾。一旦以疾卒。彬卿召或者詰之曰。此亦墮馬死耶。國史掾萬生客死於燕。妻子貧不能歸葬。彬卿予錢二千緡。俾奉柩還南昌。御史大夫朵爾直班有忤相臣。出爲湖廣行省平章政事。省署治武昌。道梗未易達。必經石頂關。歷連雲棧。過瞿唐灘。瀕出萬險而始至。從事官皆散去。獨彬卿畱。大夫曰。吾國家老臣。一死固當。彬卿爾家貧。爾當從此逝也。彬卿曰。士窮見節義。正在今日。大夫何爲出此言邪。及大夫歿。又護其喪還檀州。彬卿爲人不避事。苟使銜命而往。雖萬里不辭。凡出使卽呼官錄其行橐。且曰。去時苟增其一卽賊也。尤善以形色言人吉凶。巧發奇中。無毫髮差忒。人有意問之。輒固閉不答。彬卿貌奇古。眉毫長寸許。雙目深。其瞳閃閃。照人。黥南先生程文。以道人劍客目之。彬卿年七十餘。今猶聞其騎青驢。出入於豫章山中云。史官曰。嗚呼。世道旣降。平日素號士大夫者。恆脂韋自保祕。孰有如彬卿之剛介者乎。與人交也。勢盛則趨。勢衰則狐鼠竄。望其門而畏之。孰有如彬卿之不變其初者乎。封殖自私。汲汲恐或後。視人頗連傾覆。

縱有耳若罔聞知孰有如彬卿惠及死喪者乎自他人言之如彬卿者可謂難矣而彬卿則曰此儒者恆事耳非難也嗚呼若彬卿者不亦君子之人也哉不亦君子之人也哉

張中傳

張中字景華臨川人也少習儒以春秋應進士舉不中遂放情山水歷遊江右諸郡遇異人授以太極數學談禍福多驗時天下大亂歸隱幕府山與人言避兵之方從之者吉違則凶歲壬寅春正月上帥師下豫章御史大夫鄧愈侍上左右因薦中遣使者召至賜之坐問曰予定豫章兵不血刃市不易肆生民自此蘇息否中對曰未也旦夕此地當流血廬舍焚燬殆盡鐵柱觀亦化爲灰燼惟一殿巋然存耳夏四月指揮使康泰反一如中言中自是寵遇有加且言國中大臣將有變上宜預防秋七月平章邵榮參政趙繼祖伏甲北門欲爲亂事覺伏誅歲癸卯夏五月癸未上祭山川百神於覆舟山下問中曰此行何如中對曰吉天馬兩重似拜似舞祀畢上欲還馬忽人立作舞狀已而俯若拜是日中原贊名馬果符兩重之語中又言省署內當有震驚城中亦擾擾但於上無傷耳六月丁未忠勤樓災藥砲藏樓中遇火怒激如雷省署與樓連內外咸恐僞漢陳友諒圍我豫章三月不解秋七月癸酉上舉兵伐之召問中中對曰五日當大勝亥子之日獲其首領其戰必在南康上因命中從行舟次孤山無風弗能進中曰臣頗習洞玄法當爲祭之祭已風大作遂達彭蠡湖己丑戰湖中之康郎山常忠武王遇春深入敵舟數四圍之其勢甚危僉以爲不可救中曰無憂也亥時當自出如期果出連戰輒大勝僞吳王陳友仁及將士溺死者

無算。八月壬戌復大戰。流屍蔽江。陳友諒中飛矢卒。癸亥降其衆五萬。自癸酉至癸亥僅五旬。唯南康與康郎山小異爾。初豫章受圍。上問何日圍解。中對曰。當在七月丙戌。暨報至。乃乙酉。蓋日官算歷是月常差一日。實在丙戌解去。其他奇中。往往類此。中爲人狷介。寡與人言。嘗戴鐵冠。人因號曰鐵冠子。云贊曰。濂數與中游。見其人類佯狂玩世者。與之語。稍涉倫理。輒亂以他言。竟莫測其故。甲辰夏五月。同列二博士。有哂上意。方杜門待罪。中叩二人所生年。捉筆作點點狀。如計數者。良久笑曰。不遠復。期在七月五日。濂書而識之。至六月之晦。有旨令二人復官。頗疑其術之未盡驗。及獲見上。謝則中所期也。中之術亦異哉。上嘗親疏十事。命濂作傳藏金匱中。後六年。觀遺稿於故篋。因繕錄之。而并紀所識之事云。

胡長孺傳

胡長孺字汲仲。婺州永康人。當唐之季。其先自天台來徙。宋南渡後。以進士科發身者十人。持節分符。先後相望。曾祖臬迪功郎。欽州司法參軍。脫略豪雋。輕貨急施。人稱爲鄭莊。祖巖起嘉定甲戌進士。朝奉郎。知福州閩縣事。卓行危論。奇文瑰句。端平嘉定士大夫。皆以爲不可及。在江西幕府。平贛州之難。於指顧之頃。全活數十萬人。父居仁。瀋祐丁未進士。朝散郎。知台州軍州事。文辭政事。亦絕出於四方。至長孺其學益大振。九經諸史。下逮百氏。名墨縱橫。旁行敷落。律令章程。無不包羅而授序之。咸淳十年。以任子入官。監重慶府隔槽酒務。兼總領湖廣軍馬錢糧所僉廳。與高彭李湜梅應春等號南中八士。聲聞赫然。會宋亡。退隱山林中。至元中。詔下求賢。有司強起之。至京師。集賢院薦爲翰林修撰。言忤執政。改教授揚州。

秩滿遷建昌。適錄事闕官。檄長孺攝之。時程楚公家氣餒熏灼。卽違法。人不敢向問。其樹外門侵官道。長孺亟命撤之。轉台州路寧海縣主簿。歲丁未。浙江大祲。戊申。復無麥。民相枕死。宣慰同知脫歡察議行賑荒之令。斂富人錢一百五十萬給之。至縣。以餘錢二十五萬屬長孺藏弄。乃行旁州。長孺察其有乾沒意。悉散於民。閱月再至。索其錢。長孺抱成案進曰。錢在是矣。脫歡察怒曰。汝膽如山邪。何所受命而敢無忌。若此。長孺曰。民一日不食。當有死者。誠不及以聞。然官書具在。可徵也。脫歡察雖怒不敢問。縣有銅巖。惡少年狙伺其間。恆出鈔道。爲過客患。官不能禁。長孺爲衣商人服。令蒼頭負貨以從。陰戒驍卒十人。躡其後。長孺至巖中。人突出要之。長孺方遜辭謝。驍卒俄集。皆成擒。俾盡逮其黨。實於法。夜行無虞。民荷溺器糞田。偶觸軍卒衣。卒杖傷民。且碎器而去。竟不知主名。民來訴。長孺陽怒其誣。械於市。俾左右潛偵之。向杖者過焉。戟手稱快。執詣所。隸杖而償其器。羣嫗聚浮屠菴。誦佛書爲禳祈。一嫗失其衣。適長孺出。鄉嫗訟之。長孺以牟麥實羣嫗合掌中。命繞佛誦書如初。長孺閉目叩齒。作集神狀。且曰。吾使神鑑之矣。盜衣者行數周。麥當芽。一嫗屢開掌視。長孺指縛之。還所竊衣。長孺白事帥府歸。吏言有姦事。屢問弗伏者。長孺曰。此易易爾。夜伏吏案下。黎明出姦者訊之。辭愈堅。長孺佯謂令長曰。頗聞國家有詔。盍迎之。叱隸卒縛姦者東西。空縣而出。庭無一人。姦者相謂曰。事至此。死亦勿承。行將自解矣。語畢。吏唯而出。姦者驚。咸叩頭服罪。永嘉民有弟質珠步搖於兄者。贖焉。兄妻愛子。給以亡於盜。屢訟不獲。且往告長孺。長孺曰。爾非吾民也。去。未幾治盜。長孺嘆盜誣兄受步搖爲賊。逮兄赴官。力辨數弗置。長孺曰。爾家信有是。何謂

誣耶。兄倉皇曰：有固有之，乃弟所質者，趣持至。驗之，呼其弟示曰：得非爾家物乎？弟曰：然。遂歸焉。轉兩浙都轉運鹽使司長山場鹽司丞，階將仕郎。未上，以病辭不復仕。長孺爲人光明宏偉，務爲明本心之學，慨然以孟子自許，唯恐斯道之失其傳，誘引不倦。一時學之有如飢渴之於食飲，方嶽大臣與郡二千石聘致庠序，敷繹經義，環聽者數百人。長孺爲言：人雖最靈，與物同產，初無二本，皆躍躍然興起。至有太息者，爲辭章有精魄，金春玉撞，一發其和平之音，海內來求者如購拱璧，碑板焜煌，照耀遐荒，鄉闈取士，屢司文衡，貴實賤華，文風爲之一變。晚寓武林，病喘上氣者頗久，一旦具酒食與比鄰別云：將返故鄉，門人有識其微意者，問曰：先生精神不衰，何爲遽欲觀化乎？長孺曰：精神與死生初無相涉也。就寢至夜半，喘忽止。其子駒排戶視之，則正衣冠坐逝矣。年七十五。所著書多亡逸，唯石塘文稿五十卷，行於世。其從兄之綱之純，皆以經術文學名，之綱字仍仲，嘗作薦書，其於聲音字畫之說，自言獨造其妙，惜其書不傳之純。字穆仲，咸淳甲戌進士，踐履如古獨行者。文尤明潔可誦，人號之爲三胡云。贊曰：長孺之學，出於國子正青田余學古。學古師順齋處士同邑王夢松，夢松事龍泉葉文修公，味道，味道則徽國公朱熹之弟子也。考其淵源，亦有所自哉。初，長孺旣於學古獲聞伊洛正學，及行四方，益訪求其旨，始信涵養用敬爲最切，默存靜觀，超然自得。晚年深慕陸九淵爲人，宇宙卽吾心之言，諄諄爲學者誦之。今其說猶在，安得豪傑者興而正其異同哉。

王秉彝傳

秉彝名德良。和州人。姓王氏。王氏出江左。故望胄也。秉彝爲人龐博而堅凝。鉤經索史。智識過人。數級。嘗衆議膠葛。更端猶尋前緒。秉彝從容墜片言。輒憚然從。以故士君子恆歸往之。秉彝亦樂與盤旋。燕享之禮。必極水陸珍脆。酣嬉淋漓。不知日之將夕。閒徜徉奇山水中。見岩姿川容。網繻來獻狀。情思凝凝然。曰。精聚神會。吾殆與之無閒。豈古人所謂烟霞痼疾也邪。勸之仕。笑不答。或云。是有道者也。或云。是夫也。良其才可用世。肥遯蓋將免乎。秉彝皆棄弗省。自壬辰兵亂。秉彝崎嶇戎馬閒。雖窘迫甚。幸得不死。仰天誓曰。吾力苟可生人。雖百至凍餒不卹也。道遇羣卒縛一男子。且行且榜笞之。叱曰。不予金當就烹。秉彝視之。鄉人也。輟白金二斤贖之。出京口。軍帥有享秉彝者。既謁入。左廡倒懸一夫。頭窄窄控地。作乞命聲。秉彝曰。欲享賓而虐無辜。吾食不下咽矣。帥悟使釋。豫章有夫婦避兵者。夫死於溺。婦苦風。攀不能行。秉彝爲葬其夫。藥婦疾。至愈。乃遣。過廣德。逢健兵反接氓隸。以白刃摩其頸。老嫗隨之啼。秉彝呵曰。子脫可殺。獨不哀其母老乎。解其接縱去。行未及久。又遘一婦腹未睟兒。左手引垂髻童。童有三兄。疊疊相援泣。游卒荷戈隨其後。秉彝呼游卒止。出酒飲之。且讓曰。子壯士也。胡爲殺婦人。殺一婦人。姑實之。奈殺其五子。何。曷舍諸。游卒如其言。及僑居金華。一老儒來告曰。吾不火食者信宿矣。秉彝爲之勸容。搜園中得米二斛。悉予之。建藥區市中。畜善藥以賑人急。甚饗者不受其直。由是秉彝樂善之稱聞四方。秉彝曰。是善名我。遂以榜其堂。江左及海右士咸作爲辭章云。

史官曰。僕嘗游建業。泛大江。過歷陽。望八仙人山。山雲蟲起如車蓋。問張文昌舊隱處。想在空翠杳靄間。

故老已盡。人無能知者。及歸金華。與乘彝相見。潛溪上。衣冠偉然。議論磊落。有奇氣。第流連山水間。而志不自釋。噫。乘彝固歷陽產也。豈卽所謂隱者邪。非邪。

吾衍傳

吾衍字子行。杭人也。意氣簡傲。不爲公侯屈色。常自比郭忠恕。居生花坊一小樓。客至。值輒止之。通姓名。使其登。乃登。廉訪使徐琰一日來見。衍從樓上呼曰。此樓何敢當貴人登邪。願明日謁謝使節。琰素重衍。笑而去。生徒從衍游者常數十百人。衍坐童子地上。使冠者分番下授之。時出小青涼傘。教之低昂作舞勢。或對賓游談大噱。解髮濡酒中爲戲。羣童皆肅容莫敢動。衍左目眇。又跛右足。一俯一仰。嫵媚可觀。宛有晉宋閒風致。畜兩錢如意。日持弄之。或倚樓吹洞簫數曲。超然如忘世者。性好譏侮文學士。獨推服仇遠。及胡之純。長孺兄弟。謂百年閒所無有。初衍年四十未娶。買酒家女爲妾。至大三年秋。或訟女嘗爲己妻。官爲逮女。母死復逮母後夫。夫主衍家。會其僞券事覺。連及衍。衍固弗知也。邏卒辱衍。南出數百步。錄事張景亮識之。叱曰。是不知情何攝也。卽遣歸。或有訴衍丞相府事。下杭府治。臘月未盡。二日甲子。衍持詩別仇遠竟去。不知所之。明年三月辛酉。衛天隱以六壬筮之。得亥子丑順流象。曰。是骨朽濶泥久矣。多寶院僧故從衍學爲詩。聞其死哭甚哀。招衍魂葬之西湖上。衍通聲音律呂之學。善效李賀詩。工隸書。尤精於小篆。其志不止秦唐二李閒。宛丘趙期頤以書名世。得之衍者爲多。其所著書有尙書要略。聽玄造化集。九歌譜。十二月樂辭譜。重正卦氣。楚史檮杌。晉文春秋。道書。援神契。說文續解。石鼓詛。楚文音釋。

閒中編竹素山房詩。世多傳之。爲說者曰。衍之才高矣。使其能自貶以入繩墨。則其所進孰敢抗之哉。所學僅若是。固可尙也。亦可悲也。雖然。衍亦奇士也夫。

抱甕子傳

予嘗游括之少微山。俯瞰四周。如列屏障。山之趾有隨地形高下。爲蔬圃約二十畝。凡可茹者咸藝焉。傍列桃杏梨李諸樹。時春氣方殷。蔬苗怒長。滿望皆翡翠色。樹亦作紅白花。繽紛閒錯。如張錦繡段。心頗訝之。曰。是必有異。因曳杖而降。冉冉至其處。氣象幽夤。絕不聞雞犬聲。遙望草廬一區。隱約出竹陰閒。疑中有隱者。亟前候之。良久。見一士戴樓葉冠。身被紫褐裘。抱甕出汲水灌畦。予進問曰。夫子何名。曰。山澤之民。無所名也。強之曰。人以其抱甕也。遂呼爲抱甕子。爾曰。丈夫處世。亦多術矣。出則華軒結駟。入則鐘鳴鼎食。有志者輒能致之。夫子恆營營逐逐於一甕閒。無乃自苦乎。抱甕子忽赧然一笑。指苔磴揖予坐。寘甕於地。嘆曰。吾受血肉軀與人同。豈不樂榮貴與人異哉。顧念之頗熟。百歲之閒。寧復幾何。與其強情而徇世。寧若任真以自放也。吾圃之西則九盤山。山之顛宋州廨建焉。側有烟雨樓。當山雲初興。景象萬態。極可玩。李鄴侯。馬莊敏公嘗登之。而感慨矣。其東清溪觀。秦賢良謫官而來。亦游憩其上。時坐鸞花亭賦詩。而今竟安在哉。非惟人隨流水而逝。異日凌霄之崇構。皆蕩爲氛埃。一凝竚間。野草荒烟。若愁思之不可禁。世事往往類此。是何足深道。吾所以抱甕出入而弗辭也。且當抱甕之時。嗒然忘形。志慮外絕。精神內營。目不見色。耳不聞聲。招之弗前。麾之不驚。委蛇容裔。而萬物莫吾敢撓。自以無愧於赫胥尊盧之民。

子以吾爲逐逐營營。不亦過歟。曰。然則灌畦亦有道乎。曰。有。蔬性不欲燥。燥則生意厄而不伸。蔬性宜溼。溼或過焉。則氣傷而澁屈。吾日夜調之。變之。俾適夫厥中。則芘然而秀。媯然而榮矣。言訖。抱甕而去。予深味其言。蓋有道而隱者也。所謂強情而徇世。曷若任真而自放。不幾於樂其天者歟。所謂人物代謝。而樓觀不能以存。一俯仰閒。而感慨係之。不幾於達人。大觀者歟。所謂抱甕有術。心與耳目之官。內而弗外。不幾於守一不二者歟。所謂藝蔬得中。不使倚於一偏。不幾於治民有政者歟。疾起而追之。抱甕子入竹陰閒。閉戶高臥。扣之不見答。若無聞者。予憮然而退。

史官曰。予旣歸金華山。日思抱甕子不少置。及官南京。見朝紳中。貌有相肖者。問其同列曰。是豈括之灌畦者邪。曰。然。曰。奈何仕爲。曰。去年應聘而起。典儀晉王府。轉官起曹。翦剔浩穰。聲望蓋龐鬱云。曰。其氏名謂何。曰。此烏傷校官劉浩卿子也。名彬。其字爲宗文。予不覺嘆曰。浩卿吾故人也。其有賢子若此。予不能知之。可愧矣夫。雖然。宗文當元季政亂。肥遯山林。若將終身焉。及逢有道之朝。輒蹶然興起。以力政著聞。其得出處之正者矣。向予意其爲有道之士者。果非過歟。果非過歟。使宗文非有道之士。則長往山林而不返矣。謂之賢也得乎。因記問答之語。爲抱甕子傳。

王冕傳

王冕者。諸暨人。七八歲時。父命牧牛隴上。竊入學舍聽諸生誦書。聽已。輒默記。暮歸。忘其牛。或牽牛來責。蹊田。父怒撻之。已而復如初。母曰。兒癡如此。曷不聽其所爲。冕因去。依僧寺以居。夜潛出坐佛膝上。執筆

映長明燈讀之。琅琅達旦。佛像多士。偶獍惡可怖。冕小兒恬若不見。安陽韓性聞而異之。錄爲弟子學。遂爲通儒。性卒。門人事冕如得性。時冕父已卒。卽迎母入越城。就養久之。母思還故里。冕買白牛駕母車。自被古冠服。隨車後。鄉里小兒競遮道訕笑。冕亦笑。著作郎李孝光欲薦之爲府史。冕罵曰。吾有田可畊。有書可讀。肯朝夕抱案立庭下。備奴使哉。每居小樓上。客至。僮入報命之。登乃登。部使者行郡。坐馬上求見。拒之去。去不百武。冕倚樓長嘯。使者聞之。慚。冕屢應進士舉不中。嘆曰。此童子羞爲者。吾可溺是哉。竟棄去。買舟下東吳。渡大江。入淮楚。歷覽名山川。或遇奇才俠客。談古豪傑事。卽呼酒共飲。慷慨悲吟。人斥爲狂奴。北游燕都。館祕書卿秦不花家。秦不花薦以館職。冕曰。公誠愚人哉。不滿十年。此中狐兔游矣。何以祿仕爲。卽日將南轅。會其友武林盧生死灤陽。惟兩幼女一童留燕。俛俛無所依。冕知之。不遠千里走灤陽。取生遺骨。且挈二女還生家。冕旣歸越。復大言天下將亂。時海內無事。或斥冕爲妄。冕曰。妄人非我。誰當爲妄哉。乃攜妻孥隱於九里山。種豆三畝。粟倍之。樹梅花千。桃杏居其半。芋一區。薤韭各百本。引水爲池。種魚千餘頭。結茅廬三間。自題爲梅花屋。嘗做周禮著書一卷。坐臥自隨。祕不使人觀。更深人寂。輒挑燈朗誦。旣而撫卷曰。吾未卽死。持此以遇明主。伊呂事業不難致也。當風日佳時。操觚賦詩。千百不休。皆鵬騫海怒。讀者毛髮爲聳。人至不爲賓主禮。清談竟日不倦。食至輒食。都不必辭謝。善畫梅。不減楊補之。求者肩背相望。以繪幅短長爲得米之差。人譏之。冕曰。吾藉是以養口體。豈好爲人家作畫師哉。未幾。汝穎兵起。一一如冕言。皇帝取婺州將攻越。物色得冕。眞幕府。授以諮議參軍。一夕以病死。冕狀貌魁偉。美

鬚髯。磊磊有大志。不得少試以死。君子惜之。

史官曰。予受學城南時。見孟棗言。越有狂生。當天大雪。赤足上潛嶽峯。四顧大呼曰。遍天地閒皆白玉合。成。使人心膽澄澈。便欲仙去。及入城。戴大帽如蓑。穿曳地袍。翩翩行。兩袂軒翥。譁笑溢市中。予甚疑其人。訪識者問之。卽冕也。冕真怪民哉。馬不聖。駕不足以見其奇才。冕亦類是夫。

鄭景彝傳

鄭銘字景彝。婺之浦江人。世以孝義顯聞。景彝自幼濡染之深。卓然有以自立。面目嚴毅。不妄言笑。人多敬畏之。從父大和司家政。察其爲人。可成遠大器。聘鄉先生吳公棻爲之師。吳公授以春秋三傳之學。發凡舉例。會諸說而折衷之。景彝卽能領解其趣。所有質問。咸中肯綮。吳公極鍾愛。遂相親如父子。金華胡君翰亦來從吳公遊。景彝與之晝夜相摩切。凡天地萬物之理。內聖外王之道。古今事會之變。無不及之。講覈既久。精神發舒。大肆其力於古文辭。吳公品評至嚴。一辭稍不修。輒以爲詬病。故景彝之文。幅尺弘而體式備。胡君之文。意度密而波瀾張。皆煜煜有光於時云。初景彝早喪父。事母黃氏至孝。飲食必慎擇。以進。黃氏嗜鯪魚。雖卒不可得。必徧求之。以悅其意。會有疾。益思得魚。已而獲魚。毫以香糝上之。疾遂瘳。奉諸兄如嚴父。進退執禮甚恭。不命之坐。不敢坐。蓮塘張公無子。聞景彝賢而有文。命爲贅壻。景彝能當翁意。翁亦以客禮待之。然翁頗木訥自重。景彝亦自韜祕。絕不與人交。終日嘿嘿而坐。或焚香以銷世慮。旣而彈指歎曰。吾誦詩讀書。亦頗有志於事功。奈何鬱鬱久居此耶。黃氏歿。其志遂孤。景彝居喪盡禮。出

入必布裘。鞍轡三年。不御酒肉。翁大享賓樂作。景彝潛避去。翁不懌。或爲解曰。居喪不聽樂。其家法自當爾。翁何怪耶。翁自是不敢強。翁既老。欲以資產悉屬之。景彝辭。請以畀諸族子。翁不可。姑受其三之一。翁之亡。皆景彝葬。葬之。他受田者。漠如也。景彝之仲兄鉅歿。以次當長其家。哀痛弗忍。請至終喪。羣從固請。乃泣告外姑以歸。籍所得翁之田。廬歸於公。復自念久居於外。不親家事。能荷負者。莫如從子涓。又宗子也。遂爲文告先祠讓之。涓亦固辭。因虛其席。年六十二卒。景彝臨事重然諾。不苟於取與。鮑溪水惡。春漲多溺人。景彝架石橋其上。潘氏子母老無養。給其衣食終身。人又稱景彝爲惠人云。

史官曰。濂聞浦陽鄭氏家九葉同居。最多令子弟。而授經者之師吳公先生。又一時名士。心極傾下之。後十五年。濂以菲材來繼。吳公後始得與景彝交。徵諸所聞。益信。景彝出所作賦數首。峻潔莊凝。絕似其爲人。而他文辭亦稱。濂方惜景彝之學未暴白於世。且謂玉光劍氣。終有不可掩者。而景彝忽作土中人矣。不亦悲夫。濂與景彝暨胡君。皆吳公門人。胡君旣銘景彝之墓。濂亦不能無情。遂述爲小傳一通。以傳。嗚呼。有才無命。世之如景彝者不少。寧不使濂重有所感乎。

樗散生傳

樗散生者。錢唐人。李氏名詞。字孟言。少受學越人楊君維楨。負氣尙節。善爲詩。賣藥金陵市中。名其室曰樗亭。而自號爲樗散生。市人病者。趨其門買藥。無不與。所與必善。人人談樗散生。美不置口。或問樗散生。今人莫不願爲材。有寸誇尺。有尺誇尋。惟恐人不知己才。不卽用。旣用。又恐不得大任。以爲戚。今生乃以

樗散自名。樗不才木也。生豈無才者耶。何其嗜好與人不同也。所惡乎樗者。以其無用也。今生修善藥以活疾疾者。有功於民甚博。何爲以樗自污哉。樗散生曰。吾計之熟矣。名之美者。吾豈不欲居之。然苟無實以稱之。則名祇足爲禍。吾苟自以爲可用。彼將以有用者求我。我或不足如其所求。則爲妄人矣。吾今自以爲樗。彼亦從而樗我。不虞我足用。而我足用者。固存。何損於我乎。世之受禍深者。求名太切者也。夫名虛器。得之未必有益於身。而與我競者。齟齬也。口恨切。斷齒根肉。然欲奪之。不亦危乎。吾是以安焉。而不敢務乎名也。且吾之食者醫。醫之書易知。醫之技易學。吾誠盡吾心焉。疑於心者。不敢強施於人。薄於用者。不敢厚責其報。雖有不中。庶可以無愧矣。我誠肯自負吾才。而享釜庾之祿。豈皆不若乎人。然吏胥操法而迫吾側。民庶持牒而聒吾前。吾心欲平之。而力不暇。欲施吾才。而勢有不能。則吾心之愧無時而釋矣。豈若守易能之技。居無用之名。以自適哉。於是問者謝之。咸稱樗散生爲知道者。余聞於建安黃仁云。史官曰。樗散生之傳不虛矣。生豈果知道者哉。君子之道。貴乎食焉而無愧。吾觀世之人。有愧者多矣。生豈無見者乎。孔子強漆雕開仕。開自以爲不信。而不願爲。孔子悅之。樗散生豈學漆雕開者耶。然則謂生爲知道。豈不然耶。或謂生慕樗以不才而壽。彼莊生寓言。生蓋不取云。

李疑傳

金陵之俗。以逆旅爲利。旅至授一室。僅可榻。俛以出入。曉鐘動。起治他事。遇夜始歸息。盥濯水皆自具。然月責錢數千。否必詆誚致訟。或疾病輒遣出。病危氣息尙屬。目睛睛未瞑。卽輿棄之。而致其資。婦孕將產。

者以爲不祥。擯不舍。其少恩如此。非其性固然。地在輦轂下。四方人至者衆。其勢致爾也。獨李疑以尙義名於其時。疑字思問。居通濟門外。閭巷子。弟執業。造其家。得粟以自給。不足則以六物推人。休咎固貧甚。然獨好周人急。金華范景瀄。吏部得疾。無他子弟。人殆之不肯舍。杖踵疑門告曰。我不幸被疾。人莫舍我。聞君義甚高。能假我一榻乎。疑謝許諾。延就坐。汛除明爽室。具床褥爐竈。使寢息其中。徵醫師視脈。躬爲煮糜煉藥。旦暮執其手問所苦。如事親戚。旣而疾滋甚。不能起。洩矢與屎。汗衾席。臭穢不可近。疑日爲刮摩浣滌。不少見顏面。景瀄流涕曰。我累君矣。恐不復生。無以報厚德。囊有黃白金四十餘兩。在故逆旅邸。願自取之。疑曰。患難相恤。人理宜爾。何以報爲。景瀄曰。君脫不取。我死恐爲他人得。何益乎。疑遂求其里人偕往。攜以歸。面發囊。籍其數而封識之。數日。景瀄竟死。疑出私財買棺殯於城南聚寶山。舉所封囊寄其里人家。往書召其二子。及二子至。疑同發棺。取囊按籍而還之。二子以米饋卻弗受。反贖以貨遣歸。平陽耿子廉。械逮至京師。其妻孕將育。衆拒門不納。妻臥草中以號。疑問故。歸謂婦曰。人孰無緩急。安能以室廬自隨哉。且人命至重。倘育而爲風露所感。則母子俱死。吾寧舍之而受禍。何忍死其母子乎。俾婦邀以歸。產一男子。疑命婦事之。如疑事景瀄。踰月始辭去。不取其報。人用是多疑名。士大夫咸喜與疑交。見疑者皆曰。善士善士。疑讀書爲文亦可觀。嘗以儒舉。辭不就。然其行最著云。

太史氏曰。吾與疑往來。識其爲人。疑姁姁愿士。非有奇偉壯烈之姿也。而其所爲事。乃有古義勇風。是豈可以外貌決人才智哉。語曰。舉世混濁。清士乃見。吾傷流俗之嗜利也。傳其事以勸焉。

毛德元傳

毛聚德元者。萊之掖縣人也。幼有異質。事繼母秦盡孝。里中嘗寇至。衆驚走。秦老不能行。聚獨侍左右。弗去。寇問曰。爾不畏死耶。何爲不避我也。聚泣曰。我老母在。安敢自求活乎。寇義之。不忍犯。父嘗病疫。居崑崙山中。夜渴求酒。山深多狼虎。聚弗憚。跌走出山。乞得酒以還。父飲而愈。與兄弟分財。恣其所取。而受其棄遺者。長兄葬柩。將及壙。訛言盜且至。人懼欲奔匿。聚曰。兄柩在斯。忍棄之以圖生。卒掩壙而還。再從母殯。城隅人取其塋殆盡。聚買地瘞之。族女六人貧不能嫁。聚出私財嫁之。族中不克葬者。十餘喪。聚皆爲葬之。歲食有餘粟。則推以濟鄰里。貸不償者。則焚其券。有客宿其舍。且遺錢數百緡而行。聚徒步追五十里還之。鄰人耕侵其畔。或以告聚。聚曰。寧知非彼地耶。其居家待人無長幼。皆以誠久。而人咸信之。稱爲善士。聚生二子。蔚、炳。蔚生二子。紘、緹。皆好學。紘今由國子生。爲殿廷儀禮司序班。與余孫慎同官。相友善。史官曰。孝弟慈愛。人性所發也。寧係所習哉。萊在東海上。其俗從古。號爲難治。禹書春秋外之。今去古二千載。乃有毛君之行。是烏可以習俗古今論耶。語曰。爲善必有後。毛君之善。卓然可稱矣。其子孫殆將有昌者耶。

桑仁卿傳

桑惠字仁卿。婺之武義人。其先居麗水桑溪。南渡後。有景昭者。始遷婺。歷四世。皆不墜書詩。仁卿幼喪父。獨奉母居。不能與人浮沈。介然自守。遇人則翼然恭。未嘗往叩富兒門。惟日夕訓諸子弟。雞初號。輒呼起。

懸燈誦書。食時使從師。或值雨淖。親持蓋候之。還人笑其愚。勸曰。子貧若是。飯將生塵矣。何不學他技藝。朝出門。暮可卽得錢。讀書固佳。其效乃如捕風耳。仁卿笑曰。信如子言。吾家學將絕於吾手矣。寧餓而死。不能從也。乃召其子以時謂曰。此妄人耳。其慎毋聽。吾之貧由天。於讀書何預哉。策勵比前爲尤急。及見以時。明經能文辭。鄉校迎爲學者師。仁卿撫几自慶曰。吾將有以見祖宗地下矣。仁卿無所於食。質田於里翁。已而失其券。乃以計給仁卿至家。使重書之。或履其跗曰。慎勿言翁券失矣。翁券失矣。仁卿歎曰。吾實得錢。言猶在耳。而因失券負之。爲計固得矣。如內媿何。一里譁然稱曰。桑仁卿其誠慙人哉。未幾卒。貧不能斂手足。鄉人惜其賢。哀錢以葬仁卿。娶同縣人項寄瑗。甚賢絕。仁卿固安貧。終日樵蘇不爨。項無纖介見於容色。澹然能相歡。凍餒日不自免。聞有佳書。必掇所織布帛質之使讀。自時厥後。以時以賢良徵。主袁分宜之簿。州里攜酒漿來賀曰。仁卿夫婦不負教子。今得官歸矣。項曰。得官不足榮。能不負官斯爲榮耳。以時在分宜數督運萬里外。兢兢自持無所遺失。再轉爲温州判官。遣候人迎養。將及門而卒。今以三轉爲夔州府通判。陞至某郎。益用政事。聞於時。論者謂父母之善教云。贊曰。

子弟不患無俊良。非父母竭力教之。終不能有成也。有如仁卿忍貧教子。至樵蘇不爨。一不變。其志澹如也。卒能奮發有耀於前人。則吾所謂父母不力教子。子未必有成。誰不謂然。因作小傳以爲世勸焉。

竹溪逸民傳

竹溪逸民者。幼治經。長誦百家言。造文蔚茂。喜馳騁。聲聞煇煇。起薦紳閒。意功名可以赤手致。忽抵掌於

几曰。人生百歲能幾。旦暮所難。遂者適意爾。他尙何恤哉。乃戴青霞冠。披白鹿裘。不復與塵事接。所居近大溪。篁竹脩翳然。生當明月高照。水光激灑。共月爭清輝。逸民輒腰短簫。乘小舫。蕩漾空明中。簫聲挾秋氣爲豪。直入無際。宛轉若龍鳴。深泓絕可聽。簫已。逸民叩舷歌曰。吹玉簫兮弄明月。明月照兮頭成雪。頭成雪兮將奈何。白漚起兮衝素波。人見之嘆曰。是誠世外人也。欲常見且不可得。况狎而近之乎。性嗜菡。種之滿園。顧視若孩嬰。黃花一開。獨引觴對酌。日入不倦。人讓其留物。怒曰。舉世無知我。知我惟此花爾。一息自怡。尙可謂滯於物耶。復愛梅。梅孕綠萼。微吐赤。脚踏雪中若溫。見輒凝視。移時目不瞬。且大言曰。知我者惟菡。菡已謝我去。幸汝梅繼之。汝梅脫又謝去。我當上白鶴山采五芝耳。白鶴山蓋溪上諸峯云。逸民年五十。益恬泊無所繫。閒私謂其友曰。吾於世味愈孤矣。將漁於山樵於水矣。其友疑其誕。逸民曰。樵於水志豈在薪。漁於山志豈在魚。是無所利也。無所利樂矣。子以予果滯於梅與菡耶。君子以其語近道。有類於古隱者。相與傳其事。逸民所未嘗言。則無從知之矣。逸民陳姓。洄其名。烏傷人。史官曰。昔者李白與孔巢父等六人。隱居徂徠山。世仰之以爲不可狎。近因號爲竹溪六逸。寥寥七百年後。而逸民亦以竹溪自名。若出一轍。豈聞風而興起歟。縱曰其地或殊。人之衆獨有異。高風絕塵。照映後先。其安有不同者歟。士之沈酣聲利而弗返者。盍亦知所自警歟。夫自范蔚宗著後漢書。以隱逸登諸史傳。歷代取法而莫之廢者。其意又豈無所激歟。雖然。逸民之自爲則善矣。



